

मकबूल शाह क़ालुवार्य सुंज़ लीछिमुञ्ज मसनवी
दास्तान-ए-गुलरेज़

मकबूल शाह क़ालुवार्य सुंज़ लीछिमुञ्ज मसनवी
दास्तान-ए-गुलरेज़

Source: 'Gulrez' - compiled by Mohd. Yousuf Teng and 'Kashmiri Zaban
Aur Shairi, Vol: 3' - authored by Abdul Ahad Azad, publications of J&K
Academy of Art, Culture & Languages, Srinagar.

Condensed and Transformed version by M.K.Raina.

Work completed on 1.1.2005. Revised 15.11.2005

परिचय

मसनवी गुलरेज़ को कश्मीरी साहित्य में एक उत्तम स्थान हासिल है। मकबूल शाह क़ालुवारी की यह मसनवी कश्मीरियों में जितनी लोकप्रिय हुई, उतनी और कोई मसनवी नहीं हो सकी। यद्यपि मकबूल शाह क़ालुवारी से पहले महमूद गामी ने फारसी साहित्य की दूसरी प्रसिद्ध रचनायें जैसे यूसुफ जुलेखा, लैला मजनून, शीरीं खसरौ आदि को कश्मीरी पैरावे में ढाल कर मसनवी को एक ऊंचा स्थान दिलाया, लेकिन मकबूल शाह की यह रचना उन सब से भिन्न और उन सब से ऊपर है। गुलरेज़ के बारे में मुहम्मद यूसुफ टेंग साहब लिखते हैं कि यह मसनवी वास्तव में कश्मीरी साहित्य की दुल्हन की मांग का टिका है। इस बात से भी किसी को इनकार नहीं कि मकबूल शाह की यह रचना मूल फारसी रचना से भी बहुत आगे निकल गई है। टेंग साहब के खयाल में जिन साहित्यकारों ने मकबूल के बाद भी फारसी रचनाओं को कश्मीरी ज़बान में पेश किया, वह भी मकबूल की बराबरी नहीं कर सके।

गुलरेज़ की दास्तान मूलतः फारसी भाषा में ज़िया उद्दीन नख़्शबी ने लिखी है। यह दास्तान इतिहास से सम्बन्धित कोई घटना नहीं है बल्कि एक काल्पनिक कथा है। मकबूल शाह क़ालुवारी ने इस दास्तान को कश्मीरी काव्य का रूप कब दिया, निश्चित रूप से कुछ नहीं कहा जा सकता। एक अनुमान के मुताबिक मकबूल शाह ने गुलरेज़ १८८७ में लिखी जब उन की आयु लगभग ५० साल की थी। कुछ लोगों का खयाल है कि उन की मृत्यु १८९७ में हुई जब वह तकरीबन ६० साल के रहे हूंगे। लेकिन हामदी कश्मीरी के खयाल में मकबूल शाह १८२० में पैदा हुए और १८५५ में ३५ साल की छोटी आयु में ही चल बसे। एक और प्रसिद्ध साहित्यकार अब्दुल अहद आज़ाद का कहना है कि मकबूल शाह की मृत्यु १८७५ में हुई।

मकबूल शाह का जन्म बडगाम तहसील में नागाम के निकट एक गांव क़ाल वारी में हुआ। उन के पिता का नाम ख़ाजा अब्दुल कदूस था। मकबूल को पीर मुरीदी का काम अपने पिता से विरासत में मिला लेकिन अपनी बीमारी की वजह से वह इस काम में पूरा ध्यान न दे सके। मकबूल शाह को मिली जागीर में दो तीन गांव भी थे लेकिन वहां के निवासी खुद बहुत गरीब थे। इसलिये उन की तरफ से भी मकबूल शाह को कोई राहत नहीं मिली। नतीजा यह हुआ कि कोई खास आमदनी न होने की वजह से उन्हें ज़बरदस्त गुरबत ने आ घेरा। अपनी बेचारगी को मकबूल शाह ने कुछ इस तरह ज़ाहिर किया है :

पज़रान गुलन आरवलन हाय गरीबी, गाशस छे करान गट, तापस छाय गरीबी

मकबूल शाह की दरिद्रता का यह आलम था कि छोटी मोटी मदद के लिये भी वह सरकारी अफसरों के पास कविता में लिखी हुई याचना लेकर जाते और उन्हें सुनाते। इस सिलसिले में उन की कविता के रूप में लिखी हुई एक याचना जो फारसी भाषा में लिखी गयी है, बहुत मशहूर है। यह याचना उन्होंने ने एक सरकारी मुलाज़िम पंडित अमर नाथ को पेश की थी जिस में उन्होंने ने अपनी फसल को महफूज़ करने के लिये सरकार से प्रार्थना की थी।

गरीबी से तंग आकर मकबूल शाह ने आखिरकार थोड़े में ही गुज़ारा करना सीखा और अपनी किस्मत को ईश्वर के हवाले कर दिया:

यि म्याने क़समतु तँम्य आसि ल्यूखमुत
ति वात्यम तँस्य अथ्यन येम्य आसि जोखमुत

मकबूल शाह बचपन से ही बीमार रहते थे। बाद में उन्हें टी बी हुआ। वह दूध और फालूदा खाकर गुज़ारा करते थे। समय गुज़रते उन का जिगर भी कमज़ोर होने लगा। अपने अंतिम दिनों में वह नमक भी नहीं खा सकते थे। अपने दुख का हाल उन्होंने कुछ इस तरह से बयान किया है:

*इलतौ छुस हेरि ब्वन आवुरमुतन, ज़िलतन मँसीबतन तल ह्योतमुतन
कांह ति म्वकलन पाय छुम नु च़े सिवा, या मुहम्मद मुसतफा बख़्शुम शफा*

गुरबत, लाचारी और बीमारी के अलावा भी कुदरत ने मकबूल शाह के लिये बहुत कुछ लिखा था। बहुत समय तक मकबूल के अपनी कोई औलाद नहीं हुई। मजबूर होकर उस ने अपने भतीजे मुस्तफा शाह को गोद लिया। मुस्तफा शाह भी उच्च स्तर की शायिरी करता था। उस की एक कविता से लिये गये यह पद उस की मधुर रचनाओं का अनुमान कराती हैं।

मस चॉवथस मयखानु, जानानु यिहम ना । व्यसुरॉवथस मस्तानु, जानानु यिहम ना।।

मे रोय होवुथ दूरि दिल ह्यथ च़ोलुहम च़ूरो । फलवा गॅयस देवानु, जानानु यिहम ना ।।
कस निशि लोगुय रस, किथु त्रॉवुथस बेकस । बेगानु छी हमखानु, जानानु यिहम ना ।।

मगर अभी मुस्तफा शाह पूरी तरह खिल भी नहीं पाया था कि कुदरत ने उसे १८-२० साल की आयु में ही इस दुनिया से उठा लिया। मुस्तफा शाह की मृत्यु से मकबूल की हालत और भी खराब हो गई। उन की बिगडती हालत का अंदाज़ा उन की मसनवी से ही ली गई इस पंक्ति से बख़ूबी होता है:

शगूफस शीन गुलज़ारस कृहुन प्योम

या

हॉदुर लॉगिथ नेंदुर पॉविथ च़ोलूहम, फिराका ललुवुन थॉविथ च़ोलूहम
खरीदारो कम्मू बाज़ारु छारथ, मे तावन पोवथम कमि वानु गारथ

इस तरह की ज़िंदगी गुज़ारते हुये भी मकबूल शाह किस तरह गुलरेज़ जैसी शाहकार मसनवी लिख सके, इस बात पर सब को हैरत हैं। शोहरत और लोकप्रियता के लिहाज़ से कश्मीरी साहित्य में मसनवी गुलरेज़ का वही स्थान है जो फारसी शायिरी में जामी की यूसुफ जुलेखा और निज़ामी की शीरीन खसरौ को हासिल है, या दीवानों में दीवाने हाफिज़ शीराज़ी को हासिल है। कश्मीरियों में गुलरेज़ कितनी लोकप्रिय हुई, इस का अनुमान इस बात से लगाया जा सकता है कि १९४६ तक इस मसनवी के १८ संस्करण बिक चुके थे। तब से लेकर आज तक इस किताब के कितने ही और संस्करण छप कर बिक चुके हैं।

मुस्तफा शाह की असमय मौत से मकबूल शाह टूट चुका था। शायद कुदरत की तरफ से भी उन की यह हालत न देखी गई और आगे चल कर उस के अपने दो बच्चे हुऐ, एक लडकी और एक लडका। लडकी की शादी कलाशपोरा, श्रीनगर के एक पीरज़ादा खानदान में हुई थी। लडके का नाम पीर अली शाह था। कहते हैं मकबूल शाह की मृत्यु के समय पीर अली शाह की आयु केवल ६ महीने की थी। इस बात से यह अंदाज़ा लगाया जा सकता है कि मकबूल शाह ६० साल की आयु में नहीं बल्कि ३५ साल की आयु में ही गुज़र गये हूंगे और गुलरेज़ भी उन्होंने छोटी आयु में ही लिखी होगी।


गुलरेज़ के अलावा मकबूल शाह ने जो रचनाएँ लिखी, उन में ग्रीस्य नामु, बहार नामु, पीर नामु, मनसूर नामु व यूसुफ जुलेखा प्रसिद्ध हैं। अब्दुल अहद आज़ाद ने उन की दूसरी

कविताओं का संग्रह कुलियाते मकबूल के नाम से भी प्रकाशित किया है। कहा जाता है कि मकबूल शाह ने आब नाम, बे-बूझ नाम और नार नाम नाम से तीन और किताबें लिखी हैं, मगर उन का कोई अता पता नहीं है। गुलरेज़ केवल मकबूल शाह का सब से बड़ा कारनामा ही नहीं है बल्कि कश्मीरी साहित्य में भी इसे एक ऐसा स्थान हासिल है जिस की बराबरी शायद ही कोई और मसनवी कर सके।

मकबूल शाह क़ालुवारी की मसनवी गुलरेज़ पूरी की पूरी काव्य रूप में है जिस की भाषा मिश्रित कश्मीरी और फारसी है। हम गुलरेज़ की कथा को संक्षिप्त कश्मीरी गद्य रूप में ढाल कर आप के सामने प्रस्तुत कर रहे हैं ताकि देवनागरी-कश्मीरी पढने वाले लोग भी मकबूल शाह की इस रचना का आनन्द ले सकें। मसनवी के कुछ ऐसे महत्वपूर्ण पद जो कश्मीरी भाषा में हैं और जो कहानी की निरंतरता को बरकरार रखने में सहायक हैं, उन को कहानी में शामिल किया गया है। इन पदों को शामिल करने का एक उद्देश्य यह भी है कि पढने वाले को असली मसनवी की मधुर शैली का कुछ हद तक अंदाज़ा हो जाये।

इस मसनवी में एक कविता उस घटना को दर्शाती है जब कहानी की नायिका नोश लब नींद से जाग जाती है और नायक अजब मलिक को पास में न पाकर विलाप करती है। यह प्रसिद्ध कविता “सुबुह फोल, बुलबुलव तुल शौरो गौगाह, गॅयस बेदार मुञ्जर्यम चेश्मे शहला”, जिसे कश्मीरी काव्य में एक उच्च स्थान हासिल है और जो कश्मीरियों में बहुत ही लोकप्रिय है, इस संक्षिप्त रूपांतर में भी पूरी की पूरी पढने को मिलेगी। प्रसिद्ध लेखक श्री टी.एन.कौल इस कविता के बारे में लिखते हैं :

“(It is) a masterpiece of sorts and the most splendid example of his (Karalwari’s) art, which has remained unsurpassed so far. The 60 odd couplets deftly absorb and express the passionately intense yearning, pain and anguish ever suffered by a woman in Kashmir’s literary history, Habba Khatoon and Arnimal notwithstanding.”



दास्तान-ए-गुलरेज़

□ माँसूम शाह तु ख्वश रंग जानावार □

नखशब शहरस मंज ओस अख बादशाह। नाव ओसुस तैफूर शाह। तैफूर शाहस ओस माल जादाद स्यठाह मगर औलाद ओसुस नु कांह। औलादु सुंदि खॉतरु रूद सु द्वहस रातस ख्वदायस कुन ज़ारु पारु करान। ऑखुरकार गॅयि तसुंज मुराद पूरु तु तस ज़ाव अख लॅडकु।

*दुआ तॅम्य सुंद सपुन अज हक इजाबथ, कोरुन तस ताज़ फरज़दाह इनायथ
थनु प्यव माजि निशि जन काजकुय रौ, वुछिथ तैफूर शाह मसरूर क्याह गौ*

लॅडकस आव नाव थवनु माँसूम शाह। शाहज़ादु ओस स्यठाह जॅहीन। तस आयि थदि कुसमुच तरबियथ दिनु तु सॉरी ह्वनर तु कमाल हैछिनावनु। अकि द्वह ओस सु अख रॅगीन महफिल सजॉविथ बिहिथ:

*द्वह अकि मजलिसाह रॅगीन व आला, कॅरुन बरपाये बा अरकानि वाला
ज़ि हर गुनाह मय्यसर ऑश थोवुन, रबाबो मतरबो मय मंगनोवुन*

मजलिसि मंज ऑस्य साज वज़ान तु ख्वश यिवुन्य नगमु ऑस्य जॉरी। अँथ्य मंज पेयि माँसूम शाहस पशस कुन नज़र। अति वुछुन अख ख्वश रंगु जानावार बिहिथ।

दरीचि किन्य कोरुन बामस नज़ारा, अजब ख्वश रंग ड्यूतुन जानवारा

शाहज़ादस आव यि जानावार स्यठाह पसंद तु सु गव तस रटनु खॉतरु बेताब। दरबार्यव येलि शाहज़ादु सुंज बेकरॉरी वुछ, तिमव ह्येत सु जानावार रटनुक संज करुन। दरबार्यव कॅर्य तस रटनु खॉतरु रंगु रंगु छल। कुसमु कुसमुक्य दानु त्रॉविहॅस, मगर जानावार लोग नु ज़ालस।

दोपुस फीरिथ वॅजीरव ऐ जहांदार, करव क्याह अँस्य रटुन अँम्य सुंद छु दुशवार

व्वन्य ह्योत जानावारन वुडव करनुक संज करुन। शाहज़ादु गव ज़्यादय बेकरार। तँम्य ह्योत पनुन वछ चेटुन। सु गव यकदम थोद वँथिथ। तसुंदिस ताजस लँज ग्राय तु तमि मंज़ु पेयि केँह म्वख्तु दानु पथर। म्वख्तु वुछिथ तुज जानावारन वुफ तु वोथ म्वख्तु खेनु खॉतरु ब्वन कुन।

वुछिथ दुरदानु बोर जानावरन चाव, गुज़ा तस ओस ती, तथ प्यठ वँसिथ आव

जानावारु सुंद हाल वुछिथ सपुद दरबार्यन इतमीनान तु तिमव वोन शाहज़ादस कुन, “व्वन्य त्रॉविव तोह्य वसवास। असि लोब अँमिस जानावारु सुंद ख्वराक। व्वन्य छु यि रटुन स्यठाह आसान।” दरबार्यव वाहरोव ज़ाल तु तथ मंज़ थँविख म्वख्तु फँल्य। जानावार लोग म्वख्तु खेनि तु दरबार्यव रोट सु ज़ालस अंदर।

ब रगबत जानवारन म्वख्तु ह्योत ख्योन, जि तमाहे खाम नफसन ज़ालु लोगुन

अमि पतु आव सु जानावार अँकिस पंजरस मंज़ बंद कँरिथ थवनु। शाहज़ादु माँसूम शाह छु व्वन्य दुनियाह त्रॉविथ अँमिस जानावारु सुंदिस पंजरस ब्रॉठु कनि ब्यहान तु तस मुदय गँडिथ वुछान रोज़ान। केँह काल गँछिथ त्रोव जानावारन ख्यन चन। शाहज़ादन अनुनाँव्य रंगु रंगु म्वख्तु तु दितिन तस खेन्य। मगर जानावार सपुद नु किहिन्य ति ख्यनस तयार। माँसूम शाह सपुद स्यठाह गमगीन। तँम्य ह्योत दूह तु रात वदुन। जानावारन येलि माँसूम शाहनु यि हाल वुछ, तँम्य ह्योत तस इनसानन हुँघ् पॉठ्य मोदरि ज़बानि मंज़ पृछुन जि च़े क्याज़ि त्रोवुथ म्यानि खॉतरु दुनियाह तु गरुबार।

□ **जानावार छु पनुन हाल बावान** □

जानावारन वोन मोसूम शाहस जि हरगाह बु पनुनि असल शक्ति मंज़ आसुहॉ, बु करुहॉ शाहज़ादु सुंद गम दूर। मगर बु छुस वुन्यक्यन जानावारु सुंदिस सूरतस मंज़, बु क्याह ह्यकु

तॉरीफव वरॉय कॅरिथ। जानावारस इनसानु सुंघ पॉठ्य कथ करान वुछिथ गव मॉसूम
शाह हॉरान। तॅम्य वोन जानावारस जि सु बॉविन पनुन हाल।

दोपुन तस जानवारस बहरे लिल्लाह, सिरस पनुनिस मे करतम वारु आगाह

जानावारन कोर कॅह वनुनस साफ इनकार:

*दोपुस तॅम्य जानवारन तोरु फीरिथ, वनय क्याह सिर पनुन, गछि फाश नीरिथ
मे खद मारख, जुदा अज़ तन गछ्यम सर, ति छुम बेहतर, तु सिर बावुन नु बेहतर*

शाहज़ादु सुंद इसरार रूद जॉरी। मगर जानावार गव नु पनुन सिर बावनस तयार:

*वुनिस तामथ कोरुम नु कांह खबरदार, चु छुख तवु निश दहन दून ज्वन हुंदुय यार
वनय खद सिर पनुन बूजिथ ह्यकख नु, चु हरगिज़ ताबेह फहमीदन अनख नु
बु खदवय बावु बा मुरदम पनुन हाल, गछन सँगीन दिल वॉलिंजि परकाल*

शाहज़ादन ह्योत नु पथ कॅह। येलि नु तॅम्य थफुय तुज, जानावार सपुद मजबूर तु ह्योतुन
वनुन:

बु पॅज्य किन्य द्रख्तरे शाह पॅरी छस, बरु कॅरमुन्न ज्ये ही अँक्य जाफरी छस

“बु छस पॅरिस्तानुकि शहर बैयतुल-अमानुच बादशाह कूर। नाव छुम नोश लब। मॉलिस
छुम नाव मशहूर शाह तु माजि छुम नाव गुलबदन बेगम।” यिथु पॉठ्य सपुज नोश लबि हुंज
कथ शुरू।

□ नोश लबि हुंज कथ □

तुरकिस्तानस मंज ओस शाह बहगर्द नावुक अख बोड बादशाह। तस ओस अख नेचुव
यस नाव ओस अजब मलिक।

प्रजलवुन र्वख तसुंद ज़न माहे ताबां, वुछिथ काकल तसुंद सुंबल परेशान
अजब मलिक ओस बेयन शाहज़ादन खोतु ज़्यादु आँकुल। तस ओस मजलिस आरॉयी
करनुक स्यठाह शोख तु रँफीकन तु आँकलन मंज़ ब्युहुन ओस तस सख पसंद। अकि
दूह ओस सु यिथय पॉठ्य मजलिसि मंज़ बिहिथ ज़ि तस सपुद कम्युक ताम गमंड।

ब खॉतिर गव तँमिस यिछ बज़मे बे गम, मे रोस्तुय आसि कुस वोथमुत ब आलम
वँज़ीरन कुन दोपुन छुवु बूज़मुत जांह, मे ह्यु छा ओसमुत कांह शाह जादाह

वँज़ीरव कँरिहँस स्यठाह तॉरीफ। दोपहँस अज़ ताम छुनु कांह अखाह ति दर दुनिया ज़े
ह्यु वोथमुत। अमि पतु हेत्य तिमव प्रथ आयि अजब मलिकुन्य तॉरीफ करुन्य। तसुंदि
हुसुक्य तॉरीफ, तसुंदि कदुक्य तॉरीफ, तु तसुंजि अक्लि हुंघ तॉरीफ। अजब मलिक
ओस तॉरीफ बूज़िथ स्यठाह ख्वश। मगर मजलिसि मंज़ ओस अख बुडु शख्साह। तस
ओस नु वँज़ीरन हुंजि कथि सुत्य यितिफाक। तँम्य वोन वँज़ीरन ज़ि तुहुंद वनुन छु सोरुय
गलत। अगर तोहि पँज्य पॉठ्य काँसि हुंदि हुसनुक्य तॉरीफ बोज़ुन्य छिवु, तेलि बूज़िव मे
निशि।

सिफत हुसुक्य मे निश तुह्य बूज़तव व्वन्य, दपन कथ हुसुन, दम दिथ बूज़तव व्वन्य
ब आलम छुस नु वुन्यक्यन कांह ति साँनी, बनेमुन्न तस छे हुसुक्य मेहरबाँनी

अमि पतु हेत्य बुडु शख्सन अँकिस ज़नानि हुंघ तॉरीफ करुन्य। तसुंद हुसुन, तसुंद कद,
तसुंद र्वखसार, तसुंद ज़ूल्फ, तसुंद ड्यक, तसुंजु बुमु, तसुंजु चेश्मु, तसुंद वुठ, तसुंद
दंद, तसुंद गरदन, तसुंद सीनु, तसुंद अथु, तसुंद कमर, तसुंद कोठ्य, ज़ंगु तु ख्वर,
गरज़ प्रथ कुनि तानुक्य तॉरीफ हेत्य तँम्य तमि आयि करुन्य ज़ि बोज़न वॉल्य गॉयि
मसहूर।

बुरु तिम चेश्मु डीशिथ गँय यँबरज़ल, ज़ौलिथ गॉयि हरनु, हांगल लँग्य ब जंगल
अवेज़ान छिस प्रजलवुन्य गोशि वाराह, निवान तिम ग्रायि सुत्यन होश वाराह
तसुंज गरदन वुछिथ शर अँज़न्यन गव, ख्यवान अफसूस, वन रँट्यमुत्य छि हरनव

तमि पतु वोन तँम्य बुडु शख्सन जि तस हुस्नुचि पॅरी छु नाव नोश लब तु दुनियाहस मंज
छुनु कांह तस बराबर ।

अजब मलिकन येलि नोश लबि हुंद नाव तु तसुंदि हुस्नुक्य तॉरीफ बूज्य सु गव देवानु ।

ति बूजिथ गव स्यठाह शहजादु बेताब, खयाले ऐश-गे-शाँदी गव तँमिस खाब

तसुंदिस दिलस मंज आव गॉयबानु पॉठ्य नोश लबि हुंद लोल बरनु । तस रोव दिलुक
स्कून तु बेकरार सपदिथ पुछ तँम्य बुडस तमि मुल्कुक नाव येति नोश लब रोजान ऑस ।
बेयि यि जि स्व छा आदम किनु पॅरी ?

□ शाहजादस छु नोश लबि हुंद लोल सँनिथ गछान □

बुडन येलि शाहजाद सुंद इसरार वुछ, तँम्य द्युतुस जवाब:

*दोपुस तँम्य बुड्य, जज़ीरस मंज छु मुल्खाह, तम्युक आबो हवा बिसियार दिल ख्वाह
पॅरिस्तानाह अजायिब दर जहां छुय, ज्यतस थव नाव तथ बैयतुल-अमान छुय
पॅरी पैकर बसान तथ जायि गाहस, दपान मशहूर शाह छुख नाव शाहस
कुनिय छस कूर यस छुस नोश लब नाव, ति बूजिथ शाहजादन कूत बोर चाव*

अजब मलिक सपुद नोश लबि हुंद दर्शुन करनु खॉतरु व्वन्य बेताब । तस रोव दिलुक करार
तु सु ह्योतुन नोश लबि हुंदिस लोलस मंज देवानु गछुन ।

*व्वलो माशोकु मोरुस दूरिरन चॉन्य, कोरुस अज दिल बु आवारु ड्यकु लॉन्य
मे न्यूथम चूरि दिल रुजिथ चें दूरे, ललुवुन छुम जलुवुन नार मूरे*

अजब मलिकुन्य हालत वुछिथ द्युत बादशाहन तसुंजि दिल बहलॉयी खॉतरु साजो नगमुच
महफिल सजावनुक होकुम । सेतार व संतूर लॅग्य वजनि मगर शाहजादस लोग नु कुनि
सुत्त्य दिल । तस ऑस सिर्फ नोश लब अँछन तल । शाहजादु ओस खून हारान तु व्यदाख
दिवान । तँम्य अनुनोव बुडु शख्स बेयि नाद दिथ तु कोरनस ज़ारु पारु जि नोश लबि हुंज

वनतम बेयि कांह कथाह। शाहज़ादु सुंज हालत वुछिथ सपुद बुडस स्यठाह अफसूस।
तॅम्य वॅर पानस मलामत जि मे क्याज़ि वॅन्थ नोश लबि हुंज कथ शाहज़ादस। व्वन्थ गोछुम
नु शाहज़ादु सुंद मार खसुन मटि:

करेयम क्याज़ि यिछ कथ पार यथ आम, वॅजिम कथ प्वख्तु ऑसिथ द्रास बो खाम

बुडन ह्येन्न शाहज़ादस गांगल करनु खॉतरु तस अख नॅव दॅलील बोज़नावुन्थ, मगर
शाहज़ादु ओस नु बेयि किहिन्य बोज़नु खॉतरु तयार। सु ओस सिर्फ नोश लबि सुत्थ
मुलाकात करनस बेकरार।

*व्वलो अॅशको अॅछन अंदर करय जाय, मे कोरथम क्याह गमुक ज़ोलानु दरपाय
चु य्वदवय आशकन प्यठ तीर त्रावख, ब यक तीरे निगाह लछ खून हारख*

अजब मलिक रूद दूहस रातस नोश लबि मुतलिकुय सॉचान तु रिवान। तसुंज हालत
हेचुन वारु वारु खराब सपदुन्थ। तसुंद्य सॉरिय वॅज़ीर क्योहो रॅफीक गॅयि तस समजावनस
मंज़ तु अमि नारु मंज़ु कडनस मंज़ नाकाम। अजब मलिकस ऑस अकॉय कथ सनेमुन्न
जि मे कर सपदि पनुनिस माशोकु सुंद दीदार। अमि वरॉय ओस नु सु किहिन्य ह्यकान
सूचिथ।

*छाव गुल रोयि गुलज़ार, हाव दीदार लॅतिये
थाव कन बोज़तम ज़ार, हाव दीदार लॅतिये
सु चोन ऑयीनु र्वखसार, वुछिथ गॅय गुल ति मॅतिये
मे थोवथम बर जिगर खार, हाव दीदार लॅतिये*

आखरस गव यिमय नालु दिवान दिवान अजब मलिक ब्यमार तु प्यव दर बिस्तर। नॅदुर
रॉवुस तु ख्यन चन मोठुस। दूह पतु दूह ह्योतुन तस पान ह्वखुन। वॅज़ीरव कॅर बादशाहस
शेछ।

खबर दिन्न शाह बहगर्दस वॅज़ीरव, जिगर गोशि तुहुंद बेमार अज़ गव

बादशाह आव लारान लारान। शाहज़ादु वोथ नु मॉलिस वुछिथ थोद कैह तु न कोरनस तसलीम। तस ऑस्य् जामु च़ैटिथ तु बुथिस मातम। नेचिव सुंद हाल वुछिथ ह्योत बादशाहन अँछव किन्व् खून हारुन। तँम्य् बुलोव अख दाना तु कौबिल हँकीम मँहल खानस मंज़।

कोरुन राँही हँकीमे तेज़ दाँनिश, च़ु वुछतस नब्ज़ करतस आजमॉयिश

हँकीमस ओस स्यठाह तजरुबु। तँम्य् वुछ शाहज़ादस नब्ज़। हेरि प्यटु ब्वन ताम दिचनस नज़र। मगर शाहज़ादस मंज़ आव नु कुनि कुसमुक कांह जिस्मॉनी दोद लबनु। हँकीमस ओस नु शाहज़ादु सुंद अँदरिम दोद मोलूम। तँम्य् ह्योक नु शाहज़ादस यलाज कँरिथ।

हँकीमस अँशुकनुय दोद गव नु मोलूम, यलाजुच वथ लँबुन नु गव सु महरूम

शाहज़ादन वोनुस:

*दोपुस तँम्य् ऐ तबीबे तेज़ फितरत, यियी कर अँशुक दाँदिस रास हिकमत
मे अँशुकन दोद छुम क्या यथ छु चार, जि दरदे यार गोमुत छुस अवार*

हँकीमस येलि शाहज़ादु सुंदि असली दाद्युक पय लोग, सु गव बादशाहस यि शेछ बावनि। बादशाहन प्रुछुस अम्युक यलाज। हँकीमन वोनुस जि कांह त्युथ रँफीक गछि शाहज़ादस निश सोज़नु युन, युस तस निशि यि राज़ नोन कडि। येलि यि पताह लागि जि शाहज़ादस कसुंद अँशुक दोद छु, तेलि ह्यकव तसुंदि दाद्युक यलाज छाँडिथ। बादशाहन बुलोव अख दाना वँज़ीर। दोपनस, च़ु गछतु शाहज़ादु सुंद हमदर्द बँनिथ तु तस निशि अनतु तसुंदि दाद्युक राज़ कँडिथ।

□ वँज़ीर छु शाहज़ादस समखान □

वँज़ीर वोत शाहज़ादस निशि तु लोग यि मोलूम करनि जि शाहज़ादस कँम्यसुंद दोद छु। माय लॉगिथ वोनुनस जि मे करतु पनुनिस सिरस वॉकुफ।

वोन वॅज़ीरन शाहज़ादसः

*गोमुत कस छुख च़ आशक बावतम सिर, करन च़ेय ब्रॉठकुन दरहाल हॉज़िर
बु वालन आसि य्वद प्यठ आसमानस, दिमय छॉरिथ अँनिथ सॉरिस जहानस*

वॅज़ीरु सुंज़ि रफावॅञ्ज सुत्यू गव शाहज़ादु नर्म। तँम्य् बाँव स्व सॉरुय दॅलील वॅज़ीरस,
य्वसु तँम्य् बुडस निशि बूज़मुञ्ज आँस। वॅज़ीर गव हॉरान तु परेशान। तँम्य् ओस न तस
बादशाह सुंद नाव ज़ांह बूज़मुत तु न काँसि नोश लबि हुंद। वॅज़ीरस गव यकीन ज़ि बुडन
छि शाहज़ादस अपुञ्ज दॅलीलाह वॅन्यमुञ्ज। तँम्य् ह्योत शाहज़ादु समजावुन।

*वुनिस ताम काँसि हुंज़ि ज़ेवि छुनु द्रामुत, न नामे नोश लब दर गोश च़ामुत
गुमान छुम बुड्य गलत वोनमुत छु बे शख, अजब मलिकस ति बूज़िथ खँच़ स्यठाह च़ख*

अजब मलिकुन्य च़ख वुछिथ वोन वॅज़ीरन शाहज़ादस कुनः

*दुबार शाहज़ादस दोप वॅज़ीरन, छु कर शायान शाहन तय अँमीरन
ज़नानन हुंद रटुन दर दिल मुहब्बत, कनव बोज़ुन गछुन बरबाद तथ पथ*

शाहज़ादस गव नु वॅज़ीरु सुंदि समजावुनु सुत्यू कांह असर। शाहज़ादु रूद पनुनि कथि
प्यठ डॅटिथ। वॅज़ीरन लॉज तस ज़नानन हुंज़ि बे वफॉयी प्यठ अख दॅलील वनुन्य।

□ हज़रत ईसा तु जवान □

दपान अकि दूह ओस हज़रत ईसा वति पकान। अँकिस जायि वॉतिथ वुछ तँम्य् अख
मरगुज़ार तु पोरुन तति फातेह। मरगुज़ारस मंज़ वुछुन अख जवान इनसाना वदान। जवान
ओस स्यठाह कमज़ोर तु नोतवान। वँद्य वँद्य आसु तस अँछ स्वतेमच़ तु बासान ओस ज़ि
दूखव दाद्यव छु सु पूर पॉठ्य वोलमुत। हज़रत ईसा गव तस जवानस ब्रॉठकुन तु प्रुछनस

वदनुक वजह । जवानन दोपुनस म्य ऑस टॉठ तु रँफीक ज़नानु, स्वय गुजरेयम । बु छुस तसुंदि दादि गोलमुत तु तवय छुम मातम ।

*व्वं छुस प्रारान कजा कुनि किन्य यियम ना, ब जल्दी तस रँफीकस निश नियम ना
तँमिस रोस्तुय यियम क्याह जुव मे दरकार, तँमिस रोस्तुय लसुन म्योनुय छु दुशवार*

जवानु सँद्य व्यदाख बूज़िथ आव हज़रत ईसा हस स्यठाह आर । जवानस दोपुन ज़ि मे हाव स्व कबर येति स्व दफन छि । यि बूज़िथ तंबुल्यव जवान । तस डँल्य मगुज़ तु रोवुस ह्यसुय । अँथ्य मचरस मंज़ कोर तँम्य अँकिस कबरि कुन इशारु ।

हज़रत ईसा गव तथ कबरि प्यठ तु कोरुन म्वरदु ज़िंदु । कबर प्रॉटिथ द्राव तमि मंज़ु अख यहूद्य । यहूद्य सुंद जिस्म ओस दज़ान नारस मंज़ तु बदन ओसुस सियाह गोमुत । यि वुछिथ पुछ हज़रत ईसाहन तस ज़ि च़ु कथ प्यठ छुख यिथिस अज़ाबस लोगमुत ।

*दोपुस तँम्य तोरु या ईसा वंदय जान, गोमुत ओसुस ज़ि दुनिया ना मुसलमान
च़ु ओनुनख खॉलिकन व्वन्य म्यानि बापथ, दपुम कॅलिमु च़ल्यम द्यव दागि लानथ*

हज़रत ईसाहन परनोव यहूद्य कॅलिमु तु बनोवुन मूमिन । अमि पतु प्रूछ हज़रत ईसाहन जवानस ज़ि च़ु ओसुख वनान अथ कबरि मंज़ छि चॉन्य ज़नानु, तु कति छय ? च़े वोनथु मे अपुज़, किनु कबर हॉवथम गलथ ? जवानन दोपुस, बु ओसुस डोलमुत तु मे हॉव गलथ कबर । अमि पतु हॉव जवानन हज़रत ईसाहस असली कबर । हज़रत ईसा गव तथ कबरि निशि तु कॅरुन दुआ । कबरि मंज़ु द्रायि अख खूबसूरथ ज़नानु न्यबर । जवानस फ्यूर बुथिस रंग तु बॉच़व दूयव बोर अख अँकिस स्यठाह लोल ।

जवानन तस दोपुन माशोक म्याने, मे ऑसिम पारु गॉमुत्य दादि चाने

जवान तु तसुंज ज़नानु युथुय गरु कुन हेतिन पकुन्य, तिमन गँयि पादशाह सुंद्य सिपाह नज़रि । अमि मुल्कुक शाहज़ादु, यस सॉरिस नाव ओस, ओस गरदिश कॅरिथ वापस मँहल खानस कुन पकान । तस पेयि जवानु सुंजि ज़नानि प्यठ नज़र । तसुंद हुस्न वुछिथ सपुद

शाहज़ादु बेताब । हुपौर्य पेयि तस ज़नानि ति शाहज़ादस कुन नज़र तु तस ति गव दिल नीरिथ । शाहज़ादन वोन जवानस जि च्छु छुख चूर । च्चे दिचुथ मँहल खानस सन । यि ज़नानु छि म्यॉन्वु वॅनीज़ तु च्चे छथन यि म्यानि महलु खानु मंज़ु चूरि नीमुन्न ।

जवानस शाहज़ादन दोप च्छु छुख चूर, दिचुथ सन मँहल खानस, छा यि दस्तूर

जवानन गँड्य शाहज़ादस गुल्यु । दोपनस बु छुस नु चूर । यि छि म्यॉन्वु ज़नानु तु यि ऑस स्यठाह कालुच मूमन्न । अज़ हॉव ख्वदायन पनुन्वु क्वदरथ तु वॅरुन यि जिंदु । शाहज़ादस खोत सख र्खामु ।

*दोपुस शाहज़ादन ऐ दुज़दे तबाहकार, मूलय अज़ जानि ख्वद छुय नु यिवान आर
तुलुस थफ वथ पनुन्वु रठ नतु मारथ, अथु त्राव व्वन्वु नतु बरदार खारथ*

जवानन त्राँव ज़नानि कुन नज़र मगर स्व ऑस यीतिस कालस फीरिथ गॉमुन्न । तमि वोन शाहज़ादस जि बु छस पँज़्यु पॉठ्य शाहे आलम सुंज़ वॅनीज़ । बु अँनिनस येम्यु चूरन मँहल खानु मंज़ु चूरि कँडिथ । यि बूज़िथ च्चैज जवानस खवरव तलु म्यँन्न नीरिथ ।

ज़नानि हुंज़ कथ बूज़िथ ह्योत जवानन पनुन वछ च्चेटुन मगर ज़नानि गव नु कांह असर । स्व द्रायि शाहज़ादस सुत्यु । जवान पोक ज़नानि पतु पतु तु ह्योतुन अँछव किन्वु खून हारुन ।

रिवॉनी तस कुनथ लोग करनि विलुज़ार, पेयस शायद दिलस रहमा यियस आर

मगर ज़नानि प्यठ गव नु तसुंदि विलुज़ारुक कांह असर । स्व द्रायि शाहज़ादस सुत्यु तु पथ कुन दिचुन नु नज़र ति । जवानन ह्योत स्यठाह वदुन । अमि पतु गव सु बेयि हज़रत ईसाहस निशि तु वँनिन तस सॉरुय दॅलील । यि कथ बूज़िथ गव हज़रत ईसा स्यठाह हॉरतस । सु द्राव जवानस सुत्यु तु वोत तस ज़नानि निशि । हज़रत ईसाहन दोप तस ज़नानि:

खबर छयि कुच खॉरी तुजुन च़ेय पथ, पतव लाकन च़ु द्रायख बद तँबीयथ
परन प्यस बेयि यि अँमिसुय कुन टिकाँनी, अँमी दॉवुय दुबारु जिंदुगाँनी
ज़नानि कँर हज़रत ईसाहस निशि ति स्वय अपुज कथ बयान जि बु छस पादशाह सुंज
कँनीज़ तु अँम्य जवानन अँसुनस बु च़ूरि नीमुञ्ज ।

अँमिस सुत्यन बु शाहज़ादन प्रज़नस, बदौलत खानु पानस सुत्य अँनिनस

यि बूज़िथ तुल हज़रत ईसाहन आसमानस कुन अथु तु कोडुन तस ज़नानि वोहव । ज़नानु
पेयि वँसिथ तु बनेयस म्यँच ।

□ वँज़ीर छु शाहज़ादस समजावान □

दँलील बोज़ुनाँविथ वोन वँज़ीरन अजब मलिकस जि वुछ तु तँम्य जवानन कुचाह खॉरी
तुज तस ज़नानि खॉतरु, मगर हॉसिल क्याह आस ? ज़नानु छि बे वफा आसान तु तस
छनु माय रोज़ान ।

ज़नानाह होल तु स्योद बोज़िय नु हरगिज़, ज़नानव अँनिमुत्य दाना छि अँजिज़

अमि पतु लोग वँज़ीर तस नँसीहथ करनि जि च़े छथन नु नोश लब ज़ांह वुछमुच़ुय तु न
छुय तसुंद हुस्न वुछमुत । तेलि कथ प्यठ छुख च़ु अफसूस तु आह करान ? मगर अजब
मलिकस गव नु असर कँह । तँम्य वोनुस दर जवाब जि माशोक खदवय बे वफॉयी ति
करि, आशकु सुंज कॉम छे वफा करुन्य ।

छवकु लद गोस दिल छुम होशि डोलमुत, बु छुस तस यारु सुंजी मायि वोलमुत
दिमस फँरियाद लायस नाद यारस, कत्यथ छुम वतु वुछान पतु लारस

वँज़ीरस तोर फिकिरिह जि शाहज़ादु छुनु काँसि हुंज कथ मानन वोल । सु द्राव वापस तु
गव बादशाहस शाहज़ादु सुंद हाल बावनि । बादशाह गव यि बूज़िथ स्यठाह परेशान । तँम्य

अँन्य् सॉरी दाना तु कॉबिल वँज़ीर सॉबरिथ तु प्रूछनख ज़ि काँसि छा दर दुनिया नोश लबि हुंद नाव बूज़मुत ? तिमव द्युतुस जवाब ज़ि अँस्य् छि कोहिस्तानन, समंदरन, माँदानन, जंगलन, गरज़ दुनियाहुकिस प्रथ अंदस फेरान रोज़ान। असि छु बिसियार मुल्कन हुंद सॉर कोरमुत, मगर यि नाव छुनु असि कुनि ति जायि कनन गोमुत। पादशाह गव यि बूज़िथ स्यटाह गमगीन तु ह्योतुन अफसूस ख्योन।

कुनुय ओसुम कुनी वॉजिम वुनु मे, स्व नय आस्यम दिलुक राहत छुनु मे

□ पादशाह छु शाहज़ादस निश यिवान □

पादशाह वोत खून हारान अजब मलिकस निशि। तँमिस कोरुन दिलासा मदारा। सुती वँरनस नँसीहथ।

*अँछन हुँदि गाशि हा ख्वश बाशि म्याने, यि क्याह ओसुय च्चे ल्युखमुत करम लाने
च्यु वनतम आँश राहत क्याज़ि त्रोवुथ, ह्योतुथ मातम तु खलवथ खानु प्रोवुथ*
पादशाह गव वनान। “च्यु हरगाह दुनियुहुक कांह ति आँश आराम वनख, सु करय मयस्सर। हरगाह ज़ून छांडख, स्व वालन बु चानि खॉतरु तारख ह्यथ ज़ँमीनस प्यठ। मगर यसुंद च्चे लोल सन्योय, तसुंद छुनु कांह नेबाह निशानाह। अगर च्यु तोति वनख, बु सोज़न पनुन सोरुय लशकर तस छांडुनस। तिम दिन वँन्य् सॉरिसुय आलमस तु करन कूशिश तसुंद कांह पय पताह कडनस। मगर च्यु संबालतु पनुन्य् हालत। मे छि चॉन्य् सूरथ वुछिथ दिलस खंजर वसान। ह्ये शाहज़ादन द्युतुस जवाब:

*छु लॉज़िम आशकन लारुन अँछव किन्य्, ब हर दम खूने दिल हारुन अँछव किन्य्
ख्वरव सुत्यन पकुन छुनु शर्ते यॉरी, ब सर लारुन छु शर्ते दोस्तदॉरी*

पादशाह गव स्यटाह दिल मलूल। तँम्य् वोनुस बेयि:

खबर च्चे छय दोयुम मा छुम मे गोबराह, कुनुय च्चे ओसुहम वनतम च्चे गोय क्याह
तवक्काह ऐ पिसर ओसुम मे चोनुय, च्चे थावख जिंदु मेय पतु नाव म्योनुय
करख बर तख्ते शॉही कामरॉनी, रटख मालो खज़ानु जाय म्यॉनी

शाहज़ादस गव नु असर कैह मगर पादशाह रूद तस कुन वनान। दोपुनस ऐ म्यानि टाठि
गोबरु! च्चे छुख ना वुछान म्यॉन्य जिंदगी छि ऑखरी पडावस प्यठ वॉचमुन्न। बु कोताह
नोतवान छुस सपुदमुत। नर्यन जंगन छुम जुव द्रामुत। मे छु व्वन्य श्रावनस पोह सपुदमुत।
खबर कुस साथ आस्यम, येलि मे मोत तुलिथ नियि। म्यानि पतु छय यि ताजदॉरी
चॉनिय। च्चे कर शूबी फलवा तु आशक गछुन। चोन वजूद छु सिरिफ पादशॉही लायख।

यि कर ज़ोनुम च्चे त्रावख मुल्क तय माल, यि कर ज़ोनुम गछ्ख युथ खस्तै अहवाल

शाहज़ाद अजब मलिकस गव नु मॉल्य संजव कथव सुत्य कांह असर। सु ओस सिरिफ
नोश लबि हुंज कथ बोज़नु खॉतरु तयार। बाकय दुनियाह ओस तॅम्य त्रोवमुत। मॉल्य संजु
कथु बूज़िथ गव अजब मलिकस तलवास। दोपुनस ऐ शाहे जवान बख्त! मे हिविस
आशकस कथ छु ताजो तख्त बकार। म्यॉन्य वथ छे बदल। मे छुनु बादशॉही सुत्य कांह
वासतय।

यिमु कथु बूज़िथ वसु पादशाहस दिलस श्राकु। तॅम्य होत अँछव किन्य खून हारुन तु
वदान वदान वोनुन शाहज़ादस बेयि:

च्चे थावुम कन करय बो रुन्न नॅसीहत, मतो चलतम हेतो अमि अँशुक निशि पथ
थरे म्याने च्चे ओसुख टूर अडु फोल, वुछान ओसुस च्चे कर वारि फोली गुल
कवो कोरथो च्चे म्यॉनिस श्रावनस माग, बरय गोहम तु थोवथम बर जिगर दाग

शाहज़ादस गव मॉल्य सुंदि ओश त्रावनु सुत्य स्यठाह असर। दिल सपदुस स्यठाह रंजीदु।
दोपुन मॉलिस जि ख्वदा थॅविनय मूजूद। बु यछा पानय पानस खॉरी करुन्य। मे ऑस नु
कांह खॉहिश यि दोद पालनस। कांह येछ्या नारस मंज़ पनुन पान ज़ालुन? बु ओसुस पानु

सबरुकुय चारु छांडान, मगर पज़र गव यि जि अँम्य अँस्कन छुनम नु कांह होश थोवमुत।
अमिय छम नु चॉन्य कथ दिलस सनानः

*बु ज़न मूदुस तु शाह ऑसिन सलामत, ब नेकी ज़िंद रुज़िन ता कयामत
कोरुस लाचार अँस्कन छुम नु तकसीर, मे लीखिथ दर अज़ल यी ओस तकदीर
मे अँस्के नोश लब गव होश डॉलिथ, फिराकुक्य आतशन थोवुनस बु ज़ॉलिथ*

पादशाह रूद शामस ताम तस समजावान मगर अजब मलिक गव नु योरुकिस आलमस
फेरनस तयार। पादशाह ओस नु तस त्रावनु खॉतरु तयार, मगर तसुंद हाल वुछिथ ति
ओसुस वॉलिंजि ज्यतु प्यवान।

शाहन दोपुनस छुहम चेशमन हुंदुय गाश, कत्यू त्रावथ मे हो छम चॉन्य बँड आश

यि वँनिथ द्राव पादशाह वछ चेटान वापस।

□ अजब मलिक छु रासखस राज़ बावान □

अजब मलिकस गँयि राथ गुज़ारुन्य बडु मुश्किल। तँम्य सूज़ पनुनिस दूदु बाँयिस रासखस
शेछ तु वँनिन तस सॉरुय दँलील। दोपुनस बु छुस यछान वुन्य नोश लब छांडनु खॉतरु
नेरुन मगर पादशाह छमु नु हरगिज़ इजाज़थ दिनस तयार। व्वन्य छुहम च्युय योत रँफीक।

*रँफीकय छुख तु करतम गम गुसॉरी, छु यी दस्तूरो शर्ते दोस्त दॉरी
च्यु पखतम सुत्य करतम मेहरबाँनी, करुम यॉरी छुहम योद यारे जाँनी*

रासख गव तसुंज हालत वुछिथ तस सुत्य गछनु खॉतरु तयार। अजब मलिक गव ख्वश।
तँम्य सूज़ बेयि ति कैचन रँफीकन सुत्य यिनु खॉतरु पाँगाम तु ह्योतुख सफरस नेरनुक
संज करुन।

□ अजब मलिक छु सफरस नेरान □

ऑखुरकारु वोत सु दूह येलि अजब मलिक द्राव पनुन्यु यार दोस ह्यथ नोश लब छारनु बापथ सफरस। गुर्यन आव माल तु खज़ानु बरनु। राँत्य् रातस, कुनि जायि थख दिनु वराँय रूद्य तिम पकान तु सुबहस गाश फवलनु वख्तु वाँत्य् तिम अँकिस बियाबानस मंज़। पकान पकान ऑस्य् सारिनय ख्वरन हठ खँत्य्मुत्य्। काँसि ओस नु ताब या ताकत रूदमुत। अजब मलिक ओस वुनि ति नोश लबि हुँदिस फिराकस मंज़ अछव किन्य् खून हारान।

*वनान ओस तालेहस कुन क्याह मे कोरथम, फिराककि नारु सुत्यन सीनु बोरथम
त्रे क्याह कोरमय बु कोरथस खस्तु खाँतिर, जि शाँही दौलतस कोरथस मुसाँफिर
वँरियाह अख गव यिमन पकान। ऑखुरस येलि कूठ सफर कँडिथ अजब मलिकुन्य् साँथी
छेनिथ पेयि, शाहज़ादस बास्यव जि तिहुँद ब्रोंह कुन पकुन छु स्यठाह मुश्किल। गुर्यन ति
रूज़ नु बोर तुल्य् तुल्य् कांह सूरथ। अजब मलिकन कोर रासखस सुत्य् सलाह मशवरु।*

*वनय बु मशवरु य्वद म्योन बोज़ख, मे सुती कालुचन हुशार रोज़ख
गछव ज़ुय जँन्य् रँफीकन चूरि नीरिथ, ह्यमव वथ यिम गछन दर खानु फीरिथ*

मगर रासखन माँन्य नु अजब मलिकुन्य् कथ। दोपुनस चूरि नेरुन गव नु जान। सफर छु मुश्किल। हरगाह कुनि कांह खतरु आव तु क्याह करव। येति छु नज़दीखुय अख दँरियाव। अँस्य् गछव तूर्य्। सामानु त्रावव नावि मंज़ तु नेरव दँरियावु मँज़िय सफरस। यिथु पाँठ्य् लागि वख्त ति कम।

अजब मलिकस बासेयि रासखु संज कथ ठीक। सामानु तु गुर्य आयि नावि मंज़ त्रावनु। अदु सपुद समदँरी सफर शुरू। येति येति बँस्ती ऑसुख नज़रि गछान, तति तति ऑस्य् तिम नाव बँठिस लॉगिथ बस्ती मंज़ अचान तु नोश लबि मुतलिक पताह करान। ख्वशकी प्यठ पकान ओस तिमन अख वँरियाह लोगमुत। समंदरस मंज़ पकान गव बेयि अख वँरी। मगर हॉसिल नदारद।

□ नाव छि समंदरस मंज यीरु गछान □

अजब मलिकन कोर बेयि सोंच तु वोनून रासखस। ज़ु वॅरी गॅयि असि व्वन्य पकान। यिमन दून वॅरियन कोड नु असि अकिस पॅहरस ति थख। छुना सलाह, बेयि खसव बॅठिस प्यठ वापस तु बाकय सफर कडव ख्वशकी पेटिय। यिथु पॉठ्य ह्यकव बेयि प्रथ जायि वॅन्य दिथ। वुनि ऑस्य् तिम यि कथ सोंचानुय जि ज़बरदस्त वाव कोडुन। समंदरस आव तूफान। यिहुंज नाव आयि तूफानस मंज ह्यनु तु गॅयि यीरु। तथ सुती पॅठ्य अजब मलिकुन्य सॉरी सॉथी ति पॉनिस मंज, सामानु ति तु गुर्य ति।

मगर अजब मलिकस ओस नु वुनि क्वदरतन मोत ल्यूखमुत। तस लोग अख पचि तख्ताह अथस मंज। सु खोत अॅथ्य तख्तस प्यठ। अकि तरफु ओसुस जुव अथस क्यथ जि बु बचा किनु मरु। दोयिमि तरफु ओसुस पनुन्यन सॉथियन हुंदि मरनुक गम।

*वदान ओस मुबतला छुस दून गमन मंज, लोगुस कोत क्याह बन्योम ओसुस कमन मंज
न बूजुम यार सुंद पॉगाम नै नेब, पनुन्य यिम सुत्य् ऑसिम गॉम तिम गॉब*

अजब मॅलिकस ओस हालि बद। योत ताम नज़र ऑस पिलान, पोनिय पोन्य ओस नज़रि गछान। दूर दूर ताम ओस नु कांह जुव या कांह जिंदु ज़ॉन्न नज़रि गछान। अजब मॅलिक कूतिस कालस रूद पचि खंजि प्यठ यीरान, तम्युक लोग नु तस कांह अंदाज़। ऑखुरस वोत सु यीरान यीरान अॅकिस जुविस प्यठ। बॅठिस प्यठ खॅसिथ आव अजब मलिक पथर लायिनु। तस प्यव पनुन रॅफीक रासख याद युस समंदर बुज्य ओस गोमुत।

सु रासख गोम कोत युस यार ओसुम, सिरन महरम गमन गम ख्वार ओसुम

□ अजब मलिक छु मकानस अंदर अन्नान □

अजब मलिकन कॅर वारु वारु ह्यमथ तु ह्योतुन ब्रॉठ कुन कदम द्युन। बुथि ऑस नु कुनि कांह बॅस्तियाह नज़रि गछान। अजब मलिक रूद दूह वादन पकान। ऑखुर वुछ तॅम्य् अॅकिस जायि अख शांदार मकानु। शाहज़ादु गव कॅछा ख्वश तु कॅछा रूदुस दिलस खोफ।

मकानस निश वॉतिथ द्युतुन आलव मगर कांह सपुद नु जॉहिर। अजब मलिकन सूच ज़ि मकानु आसि खॉली। सु चाव मकानस अंदर। अति वुछ तॅम्य अख शूबवुन तु लूबवुन तख्त। तख्तस प्यठ ओस कुस ताम शौंगिथ। अजब मलिकन तुल खोचान खोचान तस नफरस वुरुन थोद। अँछन ब्रोंह कनि गॅयस ज़न नारु ब्रेह पॉदु। तख्तस प्यठ ऑस अख हूर शौंगिथ। अजब मलिकन ओस नु अज़ ताम युथ हुस्न वुछमुत। यि ऑस पँज्य पॉठ्य ज़न तु जनतुच पॅरी। अजब मलिकस आव खयाल, यिहय मा छे नोश लब ?

ज़नानु गॅयी बेदार। अख नव जवानाह ब्रोंठु कनि वुछिथ गॅयि स्व हॉरान। दोपुनस, च़ु कुस छुख तु योत किथु पॉठ्य वोतुख ? योत छुनु कांह जानावार ति ह्यकान वॉतिथ। मे छु बासान च़ु छुनख पनुन्य मोतन योर वातुनोवमुत। येति वापस फेरुन छु चोन स्यठाह दुशवार। अजब मलिकन वोनुनस:

*छुनुम वावाह मे तकदीरन ब -नागाह, गोमुत छुस मारु वनतम चारु छुम क्याह
मुसाफिर छुस तु योत अलगाँबु वोतुस, मगर बर गश्तु बख्तकि नेबु वोतुस
अर्ज छुम चानि खँजमन्न कर तु इनसाफ, कुनिय जँन्य क्याज़ि छख सिर बावतम साफ
दौयुम कांह छुय नु सुत्यन यार हमदम, गुज़ा क्याह छुय पनुन्य रुवदाद वनतम*

अजब मलिक ओस हॉरान। “यथ शिन्याहस मंज़ न छु कुनि ज़न तु न जॉपुन। बु आस यीत्य् माँदान तु जंगल च़ॅटिथ, मगर कुनि गोम नु कांह ज़ीव ज़ॉचाह नज़रि।” तॅम्य प्रुछ तस ज़नानि ज़ि ख्यनु चनु वरॉय किथु पॉठ्य छख च़ु ज़िंदु ? ज़नानि द्युतुनस जवाब ज़ि च़े छुय बद गुमानु। दय छु सारिनय रिज़्क सोज़न वोल। मे ति सोज़ि सुय येम्य बु योत वातुनावुनस तु येम्य बु ज़िंदु थॅवनस।

□ मुसाँफिर तु जानावार □

ज़नानि बोज़नोव अजब मलिक अख दॅलील। दोपुनस अख शख्साह ओस। अँमिस ओस अँकिस शहरस गछुन। गरि ओस द्रामुत तेल ख्यथ। पकान पकान गोस स्यठाह गर्म। आराम करनु खॉतरु त्रोवुन अँकिस कुलिस तल डाफ। अख तेल फोल ओस अँमिस शख्सस दंदस मंज़ रुदमुत। अँमिस पेयि प्वंद तु तेल फोल गव दंदु मंज़ु न्यबर नीरिथ तु

प्यव पथर। अख जानावार ओस कुल्य लंजि प्यठ बिहिथ। तँम्य युथुय तेल फोल वुछ, सु वोथ लंजि प्यठु ब्वन तु न्यून ख्यथ। यिथु पॉठ्य ख्वदा सॉबन तस जानावारस रिज्क सूज, तिथय पॉठ्य छु सु प्रथ अँकिस सोज़ान।

अजब मलिकस रूद नु ज़नानि हुंज कथ बूज़िथ ताब। दोपुनस मे वनतु वारु, च़ु क्वसु छख ? च़ु छखु इनसान किनु पॅरी ? अथ सिरस करतम वॉकुफ।

□ नाज़ मस्ति हुंज दलील □

मकानस मंज़ योसु खूबसूरत ज़नानु कौद ऑस, तस ओस नाव नाज़ मस्त। यि ऑस नोश लबि हुंज दूद बेनि। नाज़ मस्त ऑस अँक्य जिनन कौद कॅरमुन्न। नाज़ मस्ति वॅन्य अजब मलिकस जिनु सुंज दलील। दोपुनस बु छस पादशाह कूर। मॉलिस छुम नाव सिपाह सालार तु सु छु मुल्के बहरीनुक पादशाह। म्यानि बेयिस बेनि छु नाव मस्त नाज़। अँस्य छि बाबु सॉबन लोलु सान रँछिमुत्यु। बु ऑसुस पनुन्यन व्यसन हुंज ज़िठ तु सर्दार। बु ऑसुस अकि दूह व्यसन सुत्यु गिदान। मे ऑस्य कुमती ज़ेवर तु पलव नॉल्यु। अमिय वख्तु गव आसमॉनी अख जिन पॉदु। तँम्य तुजनस बु ज़मीनु प्यठु तु हवॉयी वुफान वातुनावुनस यथ जुविस मंज़। येति कॅरनस यथ मकानस अंदर कौद। म्यानि हालुच छनु मँहलु खानस मंज़ काँसि ति खबर। व्वन्य वोतुम अक वॅरी यथ कौद खानस मंज़ बंद। नजाथ लबनुच छम नु कांह सूरथ नज़रि गछान।

*जबरदँस्ती निशि रँछिनस ख्वदायन, मिनथ थँवनम जदन प्यठ तँम्य ख्वदायन
अमारथ छय यि तस अफरीतु सुंज जाय, छु सरकश काँसि हुंद कॅह छुस नु परवाय*

नाज़ मस्ति हुंज कथ बूज़िथ च़ाव शाहज़ादस लरज़ु। तस फ्यूर बुथिस ज़र्द रंग तु दिलस प्योस सख गम। अजब मलिकन ह्योत च़लनुक संज करुन मगर नाज़ मस्ति द्युतुनस आलव। दोपुनस मे वुछ अकि वुहुर्य इनसानु बुथ। छुना सलाह, रछाह बेहख मे निशि। अख कडख थख, बेयि करख मे सुत्य कथाह बाथाह। मगर अजब मलिक ओस बांबर्योमुत। दोपुनस मे छनु येति रोज़नुच फरागथ। दिलस छुम फ्रठ, यिनु ओरु जिन यियि

तु मॉरिथ त्राव्यम। नाज़ मस्ति दोपुनस, जिन छु वुन्य वुन्य द्रामुत। वुनि छुस वापस यिनस वारियाह वख। लिहाज़ा त्राव च्च लरज़ तु पख ब्रॉठ कुन।

*ग्वडुन्य वन च्चय पनुन्य सॉरुय हँकीकथ, कम्यू म्वखु पेश ऑयी यीच मेहनथ
कम्यू बाँयिसु वोतुख यथ मकामस, बँरिथ किथु च्चाख पानय काँद खानस*

अजब मलिकन वोनस बु छुस तुरकिस्तानुक रोज़न वोल। बु ओसुस अमि मुल्कुक शाहज़ादु। मगर मे त्रोव ताजो तख्त पनुन माशोक छारनु बापथ। व्वन्य वॉतिम ज़ु वँरी तस छारान मगर तसुंद छुम नु कांह पय पताह अथि लगान। अमि पतु वँन्य अजब मँलिकन तस पनुन्य सॉरुय दलील ज़ि किथुपाँठ्य द्रास बु नोश लब छांडनु खॉतरु सफरस तु किथु वोतुस बु पतव लाकन नाव फँटिथ यथ मकामस।

*द्वहस रातस यिमन माहन तु वँरियन, कोरुम गरदिश बियाबानन तु शहरन
न थॉवम कांह ति जाया कांह मकान, तसुंद कुनि शायि ड्चूठुम नु निशानु*

नाज़ मस्त गँयि नोश लबि हुंद नाव बूज़िथ ख्वश। दोपुनस यि मुसीबथ च्चे पथ कुन तुलुथ, सु मँशराव। च्च वोतुख व्वन्य बराबर मकामस प्यठ। चानि खुशी हुंद मोकु आव। बु ज़ानन नोश लब। स्व गँयि म्यॉन्य द्वद बेनि। अँस्य छि यिकुवट बडेमुत्य तु तमि छु म्यानि माजि द्वद चोमुत। अजब मलिकस फ्यूर यि बूज़िथ रंग। दोपुनस मे बोज़नावतु वारु तोह्य कति समखेव पानुवँन्य।

शिनासाँयी गँयी कति वारु वनतम, गछ्यम दिल शाद अज़ खॉतिर च्चल्यम गम

नाज़ मस्ति वँनिनस नोश लबि सुत्य मेलनुच दँलील।

□ नोश लबि हुंदि ज़्यनुक हाल □

दोपुनस अकि द्वह ऑस म्यॉन्य मॉज म्यानि बेनि मस्त नाज़ि क्वछि क्यथ रँटिथ ल्वलु मत्त लाय करान। अमिय सातु गँयि तस ब्रॉठु कनि अख पँरी शक्ल ख्वश पोश ज़नानाह पाँदु।

अँमिस ज़नानि आँस्य् शूबिदार ज़ेवर लॉगिथ। तमि कॅर म्यानि माजि कुन अदबु सान सलाम। म्यानि माजि ति कॅरनस वापस सलाम। स्व ज़नानु बीठ म्यानि माजि ब्रोंठु कनि। मस्त नाज़ नीनस अथु मंज़ु तु हेतिन तस म्वन्य तु मीठ्य करुन्य। अमि पतु ह्योत तमि म्यानि बेनि पनुन दूद चावुन। म्यानि माजि वोनुनस, मे वनतु च्चु क्वसु छख, नाव क्याह छुय तु योर किथु पॉठ्य आयख ?

पॅरी शकल ज़नानि ह्योत वनुन। बु छस पॅरियन तु जिनन हुंज़ बादशाह बाय। नाव छुम गुलबदन। अँकिस जुविस मंज़ छु अख शहर यथ बैयत-उल-अमान नाव छु। तत्युक बादशाह च्चु मशहूर शाह, युस ज़्यनु प्यठय छु पॅरियन हुंज़ सरदॉरी करान। बु छस तसंज़ुय ज़नानु। येमि दूह च्चे यि कूर ज़ायिय, तमि दूह आँसुस बु येमिय जायि मँज़्य पकान। तमिय सातु वोत मे ति बचु ज़्यनुक वख। बु गॅयस लाचार। मे त्रोव पानस परदु तु माँथुर पॅरिथ च्चायस यथ गरस मंज़। मे ज़ायि अख कूर। तमि पतु तुज मे स्व तु वातुनॉवुम पनुन गरु। नाव कोरुमस नोश लब। तसंज़ सूरथ वुछिथ छु मे ख्वश गछान दिल। मे छि तमी दूह चॉन्य यि कूर ति वुछमुन्न तु अँम्य सुंज माय छम दिलस गनेमुन्न। अमिय आयस अज़ लारान लारान अँम्य सुंदि लोलु योर, नतु आसुनम गरि शुर्य बॉन्न प्रारान।

*यनु स्वय नोश लब ज़ायम च्चे नखु तल, तनु प्रथ सातु आँसुम यूर्य कुन कल
हद नीरिथ मे अँम्य सुंद छुम महबथ, वुनिस तामथ मूलय आयम नु फुरसथ*

यि बूज़िथ दोपुनस म्यानि माजि जि बु ति वुछहॅन चॉन्य कूर। गुलबदन बेगमि द्युत पॅरियन होकुम जि नोश लब कॅरिवुन हॉज़िर। पॅरियि द्रायि तु अनिख नोश लब। नोश लब वुछिथ गॅयि म्याँन्य माँज स्यठाह मसरूर। तमि तुज स्व क्वछि मंज़ तु चॉवुन पनुन दूद। रछाह गॅछिथ ह्यँच गुलबदन बेगमि वापस नेरनुच सखर करुन्य।

*तँमिस कुन माजि म्याने वोन ब इखलास, च्चे तु असि वारु गव व्वन्य उलफताह खास
हके सोहबत मशी नु युथ च्चे व्वन्य ज़ांह, करुन्य गछि मेहरबॉनी गाह व बे गाह*

गुलबदन बेगमि द्युतुनस वादु जि बु आसु प्रथ र्यतु योर यिवान। तनु वोत तस नोश लब ह्यथ सोन गरु यिवान तु तति रातस रोज़ान। तथ रातस छे सानि गरि शॉद्य आसान तु द्दनुवय छि अख अँकिस लोल बरान।

□ जिनु सुंद युन तु अजब मलिकुनि अथु मारु गछुन □

नोश लबि हुंज कथ बोज़ुनॉविथ कोर नाज़ मस्ति अजब मलिकस इसरार जि सु च़ॅलिन पनुन जुव बचॉविथ, युथ नु जिन तस मॉरिथ छुनि।

*ब जल्दी तुल कदम व्वथ तोर कुन पख, समख तति माजि म्याने याम वातख
मे वौनुमय नेब व्वथ गछु दोर ह्यथ लार, यकीन बे शक मे छुम डेशख च़ु दिलदार*

अजब मॅलिक गव नु कुनुय ज़ोन नेरनस तयार। सु ओस यछान नाज़ मस्ति ति पानस सुत्यु न्युन। नाज़ मस्ति मोनुस नु। तमि दोपुसः

*चे सुत्यन म्योन येति नेरुन छु मुश्किल, पतु करि लार असि देवे सियाह दिल
गछुव खद क़ूह सासस दूर नीरिथ, तती प्यठु बाज़ गश्त अनि यूर्य फीरिथ*

नाज़ मस्ति कोर अजब मलिकस स्यठाह ज़ोर जि सु च़ॅलिन पनुन जुव बचॉविथ मगर अजब मलिक गव नु तयार। तॅम्यु कोर नाज़ मस्ति सुत्यु वादु जि सु मारि जिनस तु यिथु पॉठ्य दिवनावि तस आज़ॉदी। जिन मारुन ओस नु आसान मगर अजब मलिक ओस नु यि माननु खॉतरु तयार। तस ओस यकीन जि जिन मरि तसुंद्यव अथव। बस, सिर्फ़ गछुयस बख्त साथ द्युन।

नाज़ मस्त गॅयि मजबूर। स्व लॅज अजब मलिकुनि कामयॉबी खॉतरु दुआ करनि। पनुनिस मुकर्र वख्तस प्यठ प्यव जिन वॉतिथ। सॉरिसुय गव ज़न बुन्युल।

व्वपर शख़साह वुछुन अंदर इमारत, क़खाह बॅड लॉयिनस कुस छुख बु मारथ

अजब मलिकस येलि जिनस प्यठ नज़र पेयि, तस गव दहशथ। तॅम्य पुशुरोव पनुन पान दयस। अँदुर्य किन्त्य ह्योतुन ख्वदायि सुंद नाव, तु पनुनिस जुवस पोरुन फातेह। तमि पतु द्राव सु बे वाय पॉठ्य जिनस सुत्य दब करनि। अजब मलिकन तुज अख कमान अथस मंज़ तु कश कॅडिथ लोयुन जिनस तीर। जिन आव तीर लॅगिथुय पथर लायिनु। ज़मीनस गव अलु अलु। जिनु सुंदि बदन मंज़ु गव खून जॉरी। अजब मलिकन तुज शमशेर अथस क्यथ तु अकिय टासु कोरुन जिनु सुंद कलु अलग। तमि पतु त्रोव शाहज़ादन तसुंदिस बदनस रेज़ु रेज़ु कॅरिथ। जिनु सुंदि मरनु गॅयि नाज़ मस्त ख्वश।

*ग़लान ऑसुस बु यथ जिंदानसुय मंज़, दज़ान युथ ज़न हतब छे दानसुय मंज़
खँचुम अज़ चॉन्य बॅड मिनथ तु लादन, लगय क्वरबान वंदय सर च़े पादन*

□ अजब मलिक तु नाज़ मस्त छि बहरीन कुन नेरान □

नाज़ मस्ति कोर अजब मलिकस सुत्य वादु जि बु वातुनावथ च़ु नोश लबि निश। दूशवय सपुद्य मुल्के बहरीन कुन रवानु। सफर ओस स्यठाह क़ूठ। तिम रूद्य दूहस रातस पकान यीतिस कालस बहरीनु किस सरहदस प्यठ वॉत्य। दूशवय ऑस्य पॅक्य पॅक्य वॅसिथ पेमुत्य। ब्रॉठ कुन पकनस ऑसुख नु कांह सूरथ। ऑखुरस ओन तिमव अख कौसिद छॉडिथ। तस द्युतुख यनामु तु दोपुहँस त्युहुंद खत बहरीनु किस पादशाहस निशि वातुनावुन। कौसिद गव रॉज़ी। नाज़ मस्ति ल्यूख खत, यथ मंज़ तॅम्य तिम तमाम वाकात लीख्य यिम तस सुत्य पेश ऑस्य आमत्य। तमि पतु ल्यूख तमि अजब मलिकुनि तस निश वातुनुक हाल तु तसुंद जिनस मॉरिथ तस आज़ाद करनुच दॅलील।

*बु ऑसुस कौद दर जिंदाने हिजरान, गॅयस आज़ाद मुश्किल गोम आसान
ब कहरे हक सपुन अफरीत बरबाद, बु वॅरनस रहमतु सुत्यन शादो आज़ाद*

नाज़ मस्त ऑस गरु गछनु बापत तरसान। तस ओस मॉल्य सुंद स्यठाह लोल आमुत।
अख अख गॅर कडुन्य ओस तस कूठ बासान।

मे वाराह आमतुय छुम लोल चोन्य, सॅनिथ गोमुत दिलस छुम लोल चोन्य
ब खँदमथ वातु कर ब्रलिहेम दिलुक शर, निसारे पाये शाह करु हा पनुन सर
वलेकिन वातु कर छुम दूर मॉजिल, तवय छुम इजतराबे गोमतुय दिल
खुशी छम खाब गॉमुन्न ताब छुम नु, अँछव किन्य खून जॉरी आब छुम नु
सरापा हाल पनुनुय कोर मे इजहार, सलामत आस ऐ शाहे जहान दार

कॉसिद द्राव खत ह्यथ तु वोत पादशाहस निशि।

□ पादशाह छु खत परान तु जवाब सोज़ान □

पादशाहन येलि नाज़ मस्ति हुंद खत वुछ, तस आव अँछन गाश। सथ गॅयस जि कूर छम
सँही सलामथ। खत लोगुन पनुन्यन चेश्मन तु ह्योतुन परुन। खत पॅरिथ कोरुन कॉसिदस
शाबाश तु दोपुनस म्योन जवाब वातुनाव तस वापस। पादशाहन ल्यूख वदान वदान खतस
जवाब।

फिराक चानि ओसुम सूर गोमुत, जमीन तंग आसमान यँच दूर गोमुत
वनय क्याह चानि खॉतिर गोम कुस दाह, कराराह वारु पॉठ्यन आम नु ज़ांह
कॅरुम मे यावरी बख्तन च़ोलुम गम, वलय, कल सातु सातु तूर्य कुन छम

पादशाहन कोर कॅसिदस खत हवालु। सुत्य द्युतुनस म्वख्तु ज़ाँपानु, दायि तु ग्वलाम।
कॉसिद सपुद रवानु तु वोत नाज़ मस्ति निशि। तस वोनुन मॉल्य सुंद हाल तु बेयि द्युतुनस
तसुंद खत। खत पॅरिथ सपदेयि नाज़ मस्त शाद तु द्रायि अजब मलिक ह्यथ बहरीन कुन।

पादशाहन येलि कूर वुछ, तस च़ोल सौरुय गम। नाज़ मस्ति ति आयि नु पछ जि स्व वॉच्चा
पॅज्य पॉठ्य गरु पनुन वापस। सॉरिसुय शहरस मंज़ आयि शॉद्य मनावनु। मिसकीनन तु
मोहताजन मंज़ आव खॉरात बॉगुरावनु। अमि पतु वॅन्य नाज़ मस्ति अजब मलिकुन्य

दँलील अकि लटि बेयि मॉलिस तु कॅरिन तसुंदि बहोदरी हुंघ स्यठाह तॉरीफ। पादशाह सपुद सख मुतॉसिर। तस ओस नु यकीनुय जि अजब मलिकस हू कम वॉसि हुंद इनसान हेकि तस जिनस मॉरिथ यस लछु बँद्य रोस्तुम पूशित्थ ह्यक हन नु।

नाज़ मस्ति कोर पनुन मोल अजब मलिकुनि मकसदु निश आगाह, जि सु छु असली तल गरि द्रामुत नोश लब छंडनु बापथ। पादशाहन वोनुसः

*दोपुस तँम्य तस करुन्य लॉजिम छे यॉरी, छे तुजमुन्न चानि पुछि तँम्य यीच खॉरी
यियी येलि नोश लब रौदाद वँनिज्यस, त्युथुय वँनिज्यस अँमिस प्यठ आर अँनिज्यस*

□ अजब मलिकस छु रासख समखान □

अजब मलिकस सुत्य मुलाकात कॅरिथ सपुद पादशाह स्यठाह ख्वश। तँम्य द्युत तस शुमारु खोतु ति ज़्यादु यनामु तु पानस निशि थँवनस बेहनस जाय। तस गँयि अजब मलिकुन्य सख माय। अकि दूह द्राव शाहज़ादु शहरस कुन सॉलस। शामस बॉग्य येलि सु वापस फेरान ओस, तस पेयि अँकिस परेशान हाल शख्सस प्यठ नज़र। यि ओस तसुंद रँफीक रासख। रासखन पछोन नु शाहज़ादु कँह तिक्याज़ि तस ओस व्वन्य बुथिस रंगुय बदल्योमुत। शाहज़ादन द्युत ग्वलामन होकुन जि रासख वातुनॉविवुन महलस अंदर। शाहज़ादन प्रुछुस च़ु कुस छुख तु कति आख। रासखन वँनिनस पनुन्य सॉरुय दँलील। ऑखुरस वोनुनस जि येलि सॉन्य नाव फँट, बु लोगुस अँकिस पचि खंजि प्यठ तु यीरान यीरान वोतुस यथ शहरस मंज़। मे छनु पनुनिस रँफीक अजब मलिकस मुतलिक किहिन्य खबर जि सु छा जिंदु किनु समंदरु बुज्य गव।

*छ्वखा दिथ कोत च़ोलुम स्वख रावुरॉविथ, नखु त्रॉविथ दूखाह बोड गोम थॉविथ
लबन कति सर करस क्वरबान पायन, हट्युक रथ वंदहँस लगुहस बलायन*

रासखस गव अँछन ओश जॉरी। अजब मलिकस गव नु यि बरदाश। तँम्य दोपुसः

वफादारो मु वद बु यार छुस चोन, छुसय सुय आदनुक आरामे जान प्रोन

यि बूज़िथ गव रासखस दिल शादमान। अमि पतु बोव अजब मलिकन तस पनुन हाल।
रासख गव यि बूज़िथ ख्वश जि अजब मलिकन छु नोश लबि हुंद पय लोबमुत।

□ अजब मलिक छु नाज़ मस्ति ज़ार करान □

अजब मलिक ओस नोश लबि हुंद दीदार करनु खॉतरु बेताब। सु लोग नाज़ मस्ति आह व
ज़ॉरी करनि। तसुंज़ बे ताँबी वुछिथ वोन तस नाज़ मस्ति जि पगाह छि नोश लब पनुनि
माजि सुत्यु तोर वातन वाजेन्यु। तमि कोर अँकिस पोशु बागस मंज़ नोश लबि तु अजब
मलिकुनि समखनुक सुंज़। तमि वोन शाहज़ादसः

*चु कड तामथ क्वठचन दर बाग वाशा, बु अननय नोश लब बहरे तमाशा
अगॉफिल पॉठ्य च़े निशि वातुनावन, ब जुज़ दँरियाफ्त च़े नज़दीक थावन*

□ नोश लब छे नाज़ मस्ति निशि यिवान □

नोश लब वॉच पनुनि माजि गुलबदन बेगमि सुत्यु पादशाह सिपाह सालारु सुंद गरु। तस
ऑस नु खबर जि नाज़ मस्त छि जिनु सुंदि कौदु निशि आज़ाद गॉमुन्न। तस येलि नाज़
मस्ति प्यठ नज़र पेयि, स्व गॉयि स्यठाह ख्वश। तस युस नार दिलस मंज़ नाज़ मस्ति हुंदि
दूरिरु किन्यु ओस, सु गव छ्यतु।

*मे ओसुम लोल आमुत वारयाह चोन, चु डीशिथ काचु ज़ूने ज़न च़ोलुम ग्रोन
यिनु च़ानिच खबर ऑसुम नु अज़ ताम, नतु च़े रोस कवु यियिहे मे आराम*

नाज़ मस्ति बोज़ुनॉव स्व पनुन्य दँलील। जिनु सुंद जुलुम, अजब मलिकुन तस निशि युन,
तसुंज़ बहोदरी हुंद कारनामु तु ऑखुरस जिनु सुंद मारु गछुन, यिमु कथु वनि नाज़ मस्ति
तस वारु व्यछुनॉविथ।

ख्वादा गम काँसिनस आँसिन फवलवुन, सु छ्वख बँलराँविनस युस छुस ललवुन

नोश लब गँयि शाहज़ादु सुंद्य तॉरीफ बूज़िथ मसहूर। यि वुछिथ वोन नाज़ मस्ति तस अजब मलिकुनि अँशकुच दास्तान तु तसुंदि योर यिनुक मकसद।

*कँडिथ आँसुस निमुन्न कल चॉन्य अँशकन
तमी कजि गँजमुच्चय तस आँस हन हन*

मगर नोश लबि आयि नु वेसि हुंज कथ पसंद। तस ओस नु गुमानुय जि नाज़ मस्त करि तस सुत्यु यिछ कथ।

*चखि हँच योर दोपुनस छा यि शायान, चै तु मे व्यसु तोन व्वन्य वोट पायान
न ज्ञानन कांह न ज्ञान्यम कांह मे अज ताम, चु कवु यँच छख करान नाहक मे बदनाम
कथव चान्यव कँरुस गमगीन व दिलु तंग, फुटुरथम शीशु लोयुथ आँयीनस संग
रवा छा यी अपुज तोहमथ मे अँनिथम, जहरु बँड श्राख जन वॉलिंजि छुनिथम*

□ हकीकत बूज़िथ छे नोश लब नरमान □

नाज़ मस्ति आँस नु खबर जि नोश लब गछि यि कथ बूज़िथ नाराज़। अमिय पेयि तस् स्व दँलील वनुन्य योसु बुडन अजब मलिकस वँनिमुन्न आँस तु यथ प्यठ शाहज़ादु ताज तख्त त्रॉविथ नोश लबि छांडनि द्रामुत ओस।

*बुडस निशि बूज़िमुत्यु आँसिन सिफत चॉन्य, तवय गारान द्रामुत ओस वथ चॉन्य
कोहिस्तानन तु वॉरान खारनुय मंज, बियाबानन तु जंगल ज़ारनुय मंज*

यि बूज़िथ नरमेयि नोश लब। तस गव दिलस शोख सु जवान वुछनुक। तमि कँर नाज़ मस्ति गुज़ॉरिश जि मे करनाव तु तस शाहज़ादु सुंद दीदार।

गनेयम राय तँम्य संज गोम तॉसीर, गँयस बूजिथ तसुंद अहवाल दिलगीर

□ नोश लब छे पोशि बागस मंज अन्नान □

नाज मस्ति नियि नोश लब तथ बागस मंज येति अजब मलिक बिहिथ ओस। बाग वुछिथुय तंबुल्यव नोश लबि हुंद दिल। रंगुरंगु ऑस्य गुल फॅलिमुत्य्। वावु सुत्य् ऑस पोशन ग्राय लगान तु ज़न ऑस अँतुर फेरान। ग्वलाब, ही तु मसवल, बुनफ़शु, कारिपँत्य् तु अँशकु पेचान, यँबुरज़ल, सदबर्ग, झाफर, नवरंग, अछि पोश, गर्ज प्रथ कांह पोशि ज़ॉन्न ऑस अथ चमनस अंदर। रंगु रंगु जानावार ऑस्य मोदरि बोलि करान। कुस्मु कुस्मुक्व्य् म्यव ऑस्य कुल्यन अलूंद। कुल्यन हुंजव ग्रायव, जानावारन हुंदि च्युरगिशि तु पोशि ज़ारव मँज्य वाव पकनु सुत्य् योसु दिलस लूबुवुन्य् आवाज़ गछान ऑस, तिछ आवाज़ ऑस न सेतारन, न साज़न तु न चंगन। गुलिस्तानस वुछिथुय ऑस्य होश डलान तु जनतुक ब्रम गछान।

□ पोशि बागस मंज मुलाकात □

अँथ्य लालु ज़ारस मंज सपुद नोश लबि अजब मलिकस सुत्य् मुलाकात। बागस मंज येलि नोश लबि शाहज़ादस प्यठ नज़र पेयि, तस लोग ज़न तु लोलुक तीर दिलस। शाहज़ाद सुंद रोय ओस ज़न तु इनसानस वटुस्य् करुन लायक। नोश लबि ओस नु अथ दमस ताम युथ ह्यु खूबसूरथ जवान वुछमुत। शाहज़ाद सुंद मस, अँछ, बुमु, वुठ गर्ज प्रथ कांह तान ओस मॉर्य मॉद। नोश लब रुज़ुय नु योरुकिस आलमस सुत्य् ।

*अँमिस रोस्तुय छु मुश्किल व्वन्य् लसुन म्योन, न्यबर अज़ बाग नेरुन जुव खसुन म्योन
वँथिथ तमि जायि थोद हरगिज़ हेचिस नु, जि नंगो शर्मि ख्वद तस कुन पँचिस नु*

यीतिस कालस गँयि नाज मस्त अजब मलिकस निश तु वँनिनस नोश लबि हुंज बागस मंज वातनुच कथ। शाहज़ादन युथुय नोश लबि हुंदि यिनुच कथ बूज, सु गव देवानु। तँम्य द्युत गज़ल ख्वानन होकुम तु साज़ो नगमुच महफिल आयि सजावनु।

कत्यू छांडथ मत्यो दरशुन दिहम ना, मत्योमुत दादि चाने छुस यिहम ना
कत्यू छांडथ वलो दिलदारु म्याने, गोलुस चाने गमय गमखारु म्याने

ऑखुरस करनॉव नाज़ मस्ति अजब मॅलिकस तु नोश लबि बागस मंज़ मुलाकात। नोश लब वुछिथुय गव शाहज़ादु बेहोश। येलि तस होश आव, तस आव नु यकीनुय जि यि छु पज़र। नोश लब ऑस पॅज़्यु पाँठ्य हूर। तसुंज़ हालत ति ऑस तिछुय यिछु शाहज़ादु सुंज़ ऑस। दूशवय ऑस्यु अख अकिस प्यठ दिल हॉरिथ। तिमन बास्यव जि अख अँकिस वरॉय छि तिम ना मुकमल। अजब मलिकन वोनुस पनुनि दिलुक हालः

त्रु क्याह ज़ानख त्रे प्यठ मेहनथ तुजिम कुच, त्रे छांडान दर जहान मज़रत तुजिम कुच
तुलिम कम कम सितम अज़ दोरे आफाक, बु फ्यूरुस आलमस गाह जुफ्त गाह ताक
त्रे होवथम रोय कॅरथम मेहरबाँनी, दिचुथ जन म्वरदु जिस्मस जिंदगॉनी
छुसय बु त्रेशि होत प्यठ नागु रादस, दितम अख शरबताह व्वन्य वात दादस
बरख ना माय म्याँनी छुय सवाबाह, सपुनतम येल वनतम रुत जवाबाह

नोश लब ति ऑस बेकरार मगर यिमन कथन ओसुस नु कांह जवाबाह। स्व ऑस पॅरी जॉच, तमि किन्नु ओस नु तस तु अजब मलिकस म्युल। तमि दयुतुस जवाबः

त्रु छुख इनसान बु छस जिन्से पॅरी ज़ाद, मु थक छय अथ कलामस सुस्त बुनियाद
मे पथ य्वद रावरावख उमुर सॉरुय, लबख नु उलफतुच बोयाह मे लॉरुय
मुलुच कथ छय बु छस खोचान पामन, मे छुम ना ज़ांह गोमुत आलूद दामन

अजब मलिक ओस नु नोश लबि हुंज़ कथ मानुनस तयार। तॅम्यु वॅनिस बेयि पनुन्य ज़ारः

त्रे छुय पॅज़्यु पाँठ्य दामन पाक थोवमुत, मे छुम दिल खस्तु सीनु चाक गोमुत
सरु कर दादि चाने कुस सितम गोम, गोलुस यिथु नार डीशिथ छुय गलान मोम
जवाँनी सॉर त्रे पथ रावरावुम, हकूमत सलतनत यकबार त्रॉवुम
कमाने चानि द्युतुनम तीर सीनस, छ्वकुलद छुठ दिवान छुस प्यठ जॅमीनस

मगर नोश लब ऑस मजबूर । तमि दोपुसः

*बन्योमुत ज़ांह छुना दर मुल्के आलम, पॅरी ज़ादन हिशर आमुत ब आदम
मे इनसानन हुंजुय छम ना मुलय पछ, म कर देवानुगी येति आख तोत गछ
मु वव तथ जायि फल येति कॅह बोयी ना, गली तति ब्योल कॅह हॉसिल यियी ना*

शाहज़ादु ओस जुवस गिंदिथ अथ जायि ताम वोतमुत । सु ओस नु कुनि सूरतस मंज पथ ह्यनस तयार । तॅम्य लॉज आहो ज़ॉरी सुत्य सुत्य व्वन्य नोश लबि ख्वशामद करुन्य । तसुंघ व्यदाख बूज़िथ गॅयि नोश लब स्यठाह तंग । तमि ख्वसु कॅन्य पनुनिस दिलस ऑस प्यठु थॅवमुन्न, स्व चॅज नीरिथ । तस आव पानस ति शाहज़ादु सुंद स्यठाह लोल बरनु । मगर पॅरी ज़ाथ आसनु किन्य दिन्न तमि शाहज़ादस च्चेनुवॅन्य । दोपुनस अख वादु छुय करुन । चोन अॅशक गछि साफ तु पाक आसुन । अथ मंज गछी नु कुनि कुस्मुच नापाॅकी यिन्य । शाहज़ादन कोर यकरार ।

□ मिलाप □

द्वशवय लॅग्य अख अॅकिस तिथु पॉठ्य लोल बरनि, ज़न तु तिम वुमरन हुंघ पानुवॅन्य जुदा ऑस्य गॉमुत्य । अमि पतु लॅग्य अख अॅकिस शकायथ करनि तु अख अॅकिस सुत्य वफादॉरी हुंद वादु करनि । प्रोन गम मोटुख सोरुय ।

तिथय गॅय शाद गम मोठ प्रोन बिलकुल, खुशी यिछ बुलबुलस डीशिथ गछान गुल

अमि पतु लॅग्य द्वशवय मस च्चेनि तु अख अॅकिस जाम पिलुनावुनि । यि सिलसिलु रूद तीतिस कालस चलान यीतिस कालस द्वशवुन्य होश रोव तु अख अॅकिस नालुमति रॅटिथ पेयख नॅदर ।

□ गुलबदन छि कोरि छांडनि नेरान □

हुपॉर्य ऑस नोश लबि हुंज मॉज गुलबदन तु नाज मस्ति हुंज मॉज कोर्यन हुंदि खॉतरु परेशान। सूंचुख, कोरि द्रायि गरि साँलाह करनु खॉतरु बागस कुन, मगर यूत चेर क्याजि गोख ? गुलबदन ऑस साँचान जि कोरि छि वारियाहि काँल्य पानुवँन्य समखेमचु। नाज मस्ति हुंज बेनि मस्त नाज ति छख सुत्य् गॉमुन्न, अमिय आसन पानुवँन्य दरबाराह करनि लँग्यमुत्य्। बेयि कैह वख्तस प्रॉरिथ ति येलि नु कोरि वापस आयि, नोश लबि हुंजि माजि लँज फिकिर। स्व द्रायि तिमन छांडनि। वातान वातान वॉन्न स्व तथ बागस मंज येति नोश लब शाहजादस सुत्य् ऑस। येलि तमि पनुन्य कूर तु अजब मँलिक अख अँकिस लरि शॉगिथ वुछ, तस गव अँछन अनिगोट। कूदु सुत्य् गोस अँछव मंजु नार जॉहिर। तस आयि नु पछुय जि तसंज कूर करि युथ अतुर तु खानदानस करि रुसवॉयी।

*खजालँन्न टोंगु दवख द्युतुथम नँगीनस, फुटुम शीशु लँजिम वँन्य आबगीनस
अदावथ यिछ कमिच ऑसुय च़े म्याँनी, कँरुथ रुसवाये आलम कूर म्याँनी
सजा पानय लबख त्युथ युथ करख कार, ब्वी मा काँल्य गुल खद अज ववख खार
च़े छुय ना कैह खता राह छुम मे पानस, मे पानय प्रान मिलनोव ज़ाफरानस
खबर छन क्याह च़े ऑसुय कीनु खॉही, तवय पुछि रोब अँनिथम रु सियाँही*

□ नोश लब तु शाहजाद सुंज जुदॉयी □

नोश लब ऑस शॉगिथ मगर पँरी ज़ाथ आसन किन्य ऑस स्व माजि हुंद बुथ ति वुछान तु तसंज कथ ति बोज़ान। नँदरि मंजुय च़ायि तस मॉज ब्रॉठु कनि वुछिथ थरु थरु। तमि ह्योत बख़्शानु खॉतरु माजि ज़ारु पारु करुन। येलि नु माजि हुंद ग्वसु कुनि सूरतस मंज कम गव, नोश लबि वँन्य तस शाहजाद सुद साँरुय दलील जि सु कुस छु तु कति प्यठु छु तसुंदि खॉतरु आमुत।

स्व गॉयि शरमंद सोरुय हाल वौनुनस, तसुंद अहवाल व माहो साल वौनुनस

हकीकथ वाकई वॅनिनस मुफस्सल, खॅटिथ थोवुनस नु कांह हरफा न अमल
यि शाहज़ादय छु तुरकिसतानु आमुत, छु अॅकन ओनुमुतुय छुनु पानु आमुत
स्व बुड सुंज़ कीफियत तॅम्य बाँवनस साँर, मुच्चरनस सर ब सर सिर किस गरस दाँर

मगर तसुंघव व्यदाखव सुत्य गव नु गुलबदन बेगमि कांह असर। तमि द्युत पॅरियन होकुम
ज़ि नोश लब कॅरिवुन नवजवानस निशि जुदा।

जुदा वॅल्य वॅल्य कॅरुख यिम अख अॅकिस निश
यि कथ गछि युथ नु नॅन्य काँसि अॅकिस निश
तिथुय तुलिज्योख गछन यिम युथ नु बेदार
खबरदार युथ नु यिम सपनन खबरदार
ब खानै नोश लब गछि वातुनावुन्य
कुठिस पनुनिस अंदर ल्वति पाँठ्य सावुन्य
हुमिस गछि गाश तुरकिस्तानु हावुन
वुकरमनु सख्त दर वाँरानु त्रावुन

पॅरियव तुल शाहज़ादु तु त्रोवुख तुरकिस्तानु गॅछिथ। नोश लब तुजिख नॅदरि हॅचुय तु
त्राँवुख पनुनिस कुठिस मंज़। न रुज़ तस शाहज़ादु सुंज़ खबर तु न रुज़ शाहज़ादस
तसुंज़।

□ नोश लब छि बेदार गछान तु व्यदाख दिवान □

नोश लब येलि बेदार गॅयि, तमि दिन्न ओरु योर नज़र। पनुन पानु वुछुन पनुनिस गरस मंज़
तु शाहज़ादु ओस नु कुनिय। तस पेयि स्व विज़ याद येलि तसुंज़ मॉज रात क्युत बागस
मंज़ आयि तु स्व वुछिन शाहज़ादस सुत्य नॉली नाल। शाहज़ादु सुंज़ जुदाँयी गॅयि नु नोश
लबि बरदाश। तमि ह्योत पनुन यार छारुन तु व्यदाख दिन्य।

□ व्यदाख □

सुबुह फोल बुलबुलव तुल शोर-गे-गौगा, गॅयस बेदार, मुन्नरेम चेश्मे शहला
खबर ऑसुम बु छस दरबर निगारस, मुकर्र गोब छि पेन्न् नैदर बहारस

नज़र त्राँवम न ड्यूटुम बाग नै गुल, न बूजुम अज़ चमन आवाज़ि बुलबुल
न ड्यूटुम यार नै गुलज़ार नै बाग, न रातुक ऑश इला बर जिगर दाग

गट्ट मीजिम, सुबुह सपनुम गमुक शाम, मुसीबत प्योम अश्क अज़ गम करिम दाम
हेतिम वॅन्न् दिन्न् निगारस गुलाज़ारस, पसो पेशस यमीनस तय पसारस

वुछुम नु रोये ज़ेबा यार सुंदुय, निशाना कांह ति तस दिलदार सुंदुय
बजाये गुल ब-सीनु खार ड्यूटुम, ह्योतुम छांडुन खज़ानु मार ड्यूटुम

दपान ऑसुस दिलस बा चेश्मे पुर आब, स्व मॅजलिस रातुची मा आसिहे खाब
सु ऑशा राहता दशवन्न् ब्रेमा ओस, खुशी शूब्यस वनुन्न् कर मातमा ओस

मन्नर ओनुनम तन्नर कोरुनम बदनस, वदान आलव हेतिम दिन्न् तस मदनस
निगारा बे मदारा सरदि महारा, बुता, माहे मुनीरा, खूब चहरा

हौंदर लॉगिथ नैदर पाँविथ च़ोलूहम, फिराका ललुवुन त्राँविथ च़ोलूहम
मतो च़लतम मत्यो मॅन्नराँवथस बो, यितो बेये सथ गछ़यम मॅशराँवथस बो

परन पादन प्यमय थॅवथम मे लादन, दितम सर आलवय आलव च़ु नादन
वदुन त्राँविथ च़लुन च़ूरे रवा छा, थवुन युथ दाग मस्तूरे रवा छा

दुर फलि म्यानि कथ गोशस रॅटुथ जाय, च़े गोशन म्योन गोय ना त्राँवथम माय
खॅरीदारो कम्मू बाज़ारु छारथ, मे तावन पोवुथम कमि वानु गारथ

हरेयस आरवल गोलाबु बोयो, दॅज़स महताब ज़न महताब रोयो
पॅरी देवानु वॅरथस माह जबीनु, यिहम ना बहर लिल्लाह मह जबीनु

कमां ज़न गोम कद बद वलजमाले, सेद्योमुत तीर अँशुकुन हियु माले
जूलेखा यूसफो च़े पथ अनेयस, मतेयस वामिको अज़रा बनेयस

ब-तल्खी छस दिवान शीरीन फ़रियाद, गछ़यम ना पाँदु ख्वश दीदार फरहाद
कोतू च़ोलहँम मत्यो मजनून म्याने, मे थोवथम दोद ललुवुन लॉलि जाने

थफा दिथ नकदि दिल ह्यथ दूर गोहम, जफा कारो शिलस सँन्य चूर प्योहम
मदन वारो बदन गोहम मे ज़ॉलिथ, ह्यकय नो दूरिरुक आतश बोँ च़ॉलिथ

मलालु गोय कम्युक, कवु पुच़ि मे रूढुक, कॅमिस ताले वरस इकबाल ब्यूढुक
चरागे खुरमी छेवरिथ गमुक वाव, अनि गोट गोम माह र्वखसारु म्वख हाव

फरोगे नूरे माह र्वख चूरि हावुम, बिहिशतियो जमाला हूरि हावुम
पतु यिमहय अमा वथ छम नु मोलूम, नतु ज़रुहा नु हिजरुक तीरि मसमूम

शेछा लदुहय अमा कांह छुम नु दर दिल, च़े थोवथम लालु रोयो दाग बर दिल
कुसू सोज़य, कुसू बावी यि तकरीर, पक्यम कुस तोत सिवाये बादि शबगीर

यितो हा सुबुह के ख्वशबोयि वावो, नितो तस गुलाज़ारस म्यानि ग्रावो
ज़ि गरदि राह वु दामन दुन्यज़ि अवल, पस अंगु नॅट्य नॅट्य गॅछिज़्यस बरस तल

अदब रँछिथुय सदा कॅर्यज़्यस ब हलकु, खबर आहस्तु वॅन्यज़्यस मोदरि हलकु
जफा अंदेशि कस त्रॉविथ स्व मज़लूम, कोरुथ क्याह थामि लॉजिथ पामु माँसूम

मुहिथ गव ह्यन वॉनिथ छनु काँसि ज़ानान, वुहिथ गॉयि चानि पच्चि ऐ जाने जानान
पर्युन सीनस सपुद तस चानि होलु, वु डोलहस लोलु रस्त्यो अहदो कौलु

मे कॅर्यथम होलु सुत्य परकालु पानस, कवो वुय लालु फोरहम बालु पानस
मुदा आँसुय करुन्य आँखुर जुदॉयी, योहय छा साँ तॅरीके हक अदॉयी

शिकस्तु दिल कॅरिथ तनाज़ो मगरूर, समन अंदामु ब्यब बॅरथस बज़ंबूर
हतो वावो वु क्या ज़ानख मे क्या गव, गॅमुत्य छिम वॉलिंजे दमगीरकी स्रव

बिहिथ कथ गुलशनस मंज़ गुल अंदाम, सही सरवुन सही अँन्युज्यम मे पाँगाम
ह्यसु डॅजरॉवनस मस दिथ मसाँछिव्य, बन्यम नै मल वुन्यम दामानु रिव्य रिव्यि

छेतु मशाल गॅयस यावुन व्यतु गोम, स्वतेयस वॅद्य वॅद्य शोरस ज्यतु प्योम
तनूरस अश्कनिस मंज़ छस हतब ज़न, वनस दॅदवन कोरुम तॅम्य सरवि सबज़न

खज़ान चाम अचवुन्य सुय बहारस, सुली द्वह लूसिथुय गव पोह हारस
हँदुर ज़न गॅजसु श्रावनु आफताबु, ब-ताबम चूं तपद माही ब-ताबु

फवलुवुन्य सुय बहारस अँरनि रंग गोम, म्वलुलिस आँशिकिस खँज़रस श्रंग गोम
दु-हफ्तुचि ज़ुनि सर तुलिथुय ग्युहुन प्योम, शोगूफस शीन गुलज़ारस कुहुन प्योम

हियि थॅर यावुनन्य कॅरथम बरु मे, ज़रु ज़रु सीम तन ज़ॉजुथ ज़रु मे
शमा सूरत बु छस गरयान व सोज़ान, चू परवानु, सु बे परवानु बोज़ान

यँबरज़ल तस बँबूरनि मायि वँजनस, फ़ेकुवन्य़ च़र ग्रकुवुनि तावु तँजनस
फवलुवन्य़ पोशि थँर छँच़रॉवनस बँ, असुवन्य़ वँद्य़ वँदी व्यसुरॉवनस बँ

सनोबर कामतन हँज वीर कँरनस, स्वनस सरतल गँयम, तशहीर कँरनस
सरुक पम्पोश ऑसुस फोजमुच्चय हॉर्य, कँरुस गरकाब गमे खवरशीद र्वखसॉर्य

दुपहरन शाम मे गोम खाम कारे, दुरस गोम फोतु रुदुम तोतु हारे
गँजुस कँज काम दीवुनि आमनेयस, लोगुम दर लावि मूरे आवुसेयस

कबाबुक्य़ पॉट्य़ तँजनस गरुम तावे, अडु दँज़ च़ुन्य़ गँयम सरमूरि लावे
च़ँटिथ कँम्य़ शँत्रनुय़ लोगुम मित्र मे, लँदिथ तासस पेयम तोसस अँथुर मे

तिथिस जानानुसुय़ रोस्तुय़ लसा बो, सु त्रॉविथ गॉरनुय़ सुत्यन बसा बो
सु त्रॉविथ कर यियम नँदुर तु नेह मे, सु त्रॉविथ शरबते शीरीन छु वेह मे

गुलिस्ताने बे र्वखि गुल र्वख छु ज़िंदान, सरीरुक न्वक्तु सँगीन तर ज़ि सिंदान
सु त्रॉविथ मंगु क्या यथ पॉट्य़ प्रंगस, सु त्रॉविथ मा ज़ु कर बँ नक्शो रंगस

सु त्रॉविथ कर गुलन प्यठ दिल लग्यम मे, चो बुलबुल बाग छावुन कर तग्यम मे
बिहिश्ते जाविदां दोजुख चू बे यार, ब-तन ज़ंजीर ज़ेवर तख्त ज़न दार

बसर अफसर गमुक कर गॉरि दिलबर, ब-पहलू फरशि मखमल खार बसतर
सरासीमह गँयस जामन द्युतुम चाख, मोलुम ऑयीनु खानस सूर तै खाख

व्यदाख ऑसुस दिवान हिजरुच करान ल्यल, व्वलो कँरथस बरु ताज़ु यँबरज़ल

□ गुलबदन बेगम छि नोश लबि जानवर बनावान □

नोश लबि हुंज मॉज गॅयि तसुंद व्यदाख बूजिथ जादय गजबनाक । तमि वोन कोरि कुनः

कॅमी शॅत्रन च् अथ यिछि नावि वॉजिख, मित्र लॉगिथ कॅमी तच्चि तावि जॉजिख
हया बर ताक थॉवुथ शर्म त्रॉवुथ, पॅरी क्रॉनिस खजालथ वातुनॉवुथ
कॅबीलस मंज च्ने पानस दाग थोवुथ, ब दुनिया नाव सोनुय मंदुछोवुथ
गॅयख अज कारे बद बदगारो बदनाम, थॅवुथ पानस पॅरी क्रॉनिस अंदर पाम

अमि पतु कोर गुलबदन बेगमि ज़बरदस्त लानु तानु कोरि । नोश लबि ओस ओश जॉरी ।
मॉज गॅयि नु कुनि सूरतस मंज तस मॉफी दिनस तयार । तमि पॅर मॉथुर तु द्युतुन कोरि
फवख । नोश लब बनेयि जानावार । माजि ज़ोन जि अमिय सुत्त्य रोज़ि तसुंज कथ खॅटिथ ।

तमि दूह प्यठु वोत नोश लबि जानावार बॅनिथ दर दुनिया फेरान तु अजब मलिकस
छांडान । दॅहन वॅरियन फीर स्व बियाबानन, जंगलन, पहाडन, समंदरन तु बॅस्तियन, मगर
कुनि जायि लोब नु तमि तसुंद कांह नेब ।

□ मॉसूम शाहस छु नोश लबि हुंज दलील बूजिथ सख असर गछान □

जानावार (युस असली नोश लब छि) म्वकल्यव दॅलील बोज़ुनॉविथ । तॅम्य वोन मॉसूम
शाहस जि अज वॉत्य मे दह वॅरी येमी शक्ति । बु फीरुस चहारू तरफ मगर सु यार आम नु
कुनि अथि । च्ने कुन पेयम नज़र तु चॉनिस बुथिस मंज आम तसुंद अनहार ह्यू बोज़नु ।
लोल ह्यू च्चोलुम तु पनुन पान कोरुम ज़ोरु चॉनिस ज़ालस मंज गिरिफतार ।
मॉसूम शाह गव जानावार सुंदिस राजस वॉकुफ । तॅम्य द्युत तस दिलासुः

दोपुन तस रोज़ ख्वश गम त्राव सॉरी, करय बु अथ गमस मंज गम गसॉरी
मुसॉफिर लॉगिथय हमराह ह्यमथ बॅ, सु दिलबर चोन छांडन हर सिमत बॅ

मॉसूम शाहन कोर जानावरस सुत्यू वादु जि सु वातुनावि तस अजब मलिकस निशि। मगर जानावारस ओस नु यकीन जि मॉसूम शाह ह्यू मॉसूम इनसान हेकि अजब मलिकस छौंडिथ। जानावारन वॅन्यु तस मिसालि पॉठचन अख दॅलील।

□ हाजथ □

दपान अख बुर्जगाह ओस। नाव ओसुस इब्राहीम। बाह वॅरी गॅयी, तसुंदिस नफसस गॅयी अख दॉन खेनुच खौंहिश। दूहय रूद सु बुर्जगस दॉन मंगान, अख दॉन, चोक या मोदुर। मगर बुर्जगन वॅर नु ज़ांह तसुंज खौंहिश पूर। अकि दूह गव इब्राहीम अँकिस दरवेशस निशि। दरवेश ओस ब्यमार। सलामाह वॅरिथ पुछ इब्राहीमन तस जि कांह तमन्ना मा छुय, बु करुहॅय सु पूर। दरवेशन दोपुस, “मरहबा छुय अथ लियाकतस। पनुनि नफसुक हाजथ कडनुक छुय नु ताकत, तु लूकन छूख साल करान। युस नफर नु पनुन हाजथ पूर हेकि वॅरिथ, सु क्याह करि बेयिस।”

यि दॅलील बोज़ुनॉविथ वोन जानावारन मॉसूम शाहस:

*दोपुन मॉसूम शाहस कुन ब तॉज़ीम, मे हाजथ नेरि नु पानस च़े छुय बीम
बनी नु यस कडुन हाजथ पनुन ज़ांह, मुरादे दिल वनुन तस हॉसली क्याह*

मॉसूम शाहस लॅज जानावारु सुंज कथ दिलस मगर ह्यमथ हॉरुन नु कैह। तॅम्य वोनस दरजवाब जि च़े छय असली तल पानस ईमानुच कॅमी। ख्वदा छु प्रथ अँक्य सुंज मुराद पूर करन वोल। प्रथ रॉन्न पतु छु गाश फवलान तु अनिगोट खत्म गछान। आँखुरस छु ती सपदान यि ख्वदा सॉबस करुन छु आसान। अथ प्यठ ह्यँच मॉसूम शाहन जानावारस अख दॅलील बोज़ुनावुन्यु।

□ हारुन रॅशीद तु शाहज़ादु □

दपान अख बादशाह ओस। नाव ओसुस हारुन रॅशीद। सु ओस स्यठाह अँमीर, सँखी तु रहमदिल। ख्वदायि सुंज इबादथ ति ओस स्यठाह करान। दपान अकि दूह ओस सु

अँकिस बागस मंज खलवत बिहिथ इबादथ करान जि तस ब्रोंटु कनि गव अख जानावार जॉहिर। जानावार ओस स्यठाह खूबसुरथ। कलु ओसुस सब्ज रंगु तु पखु आसस वज्जजि। हारून रँशीदस तंबुल्यव जानावारस वुछिथ दिल। युथुय जानावार हारून रँशीदस ब्रोंट कुन आव, तँम्य दिन्न तस थफ तु रँटनस जंग। जानावार गव वुडिथ तु हारून रँशीद रूद तसंज जंग रँटिथुय अवेजान। जानावार खोत वारियाह थोद तु रूद वुडान। बादशाह गव दम फुट्च। जंग यलु त्रावनस ति ओसुस नु वार। अँछन गोस अनिगोट तु पनुनि जिंदुगी हुंज व्वमेद त्राँवन। आँखुरस करि तँम्य पनुनि अँछ बंद।

*हेचन नु चेश्मु मुन्नरिथ त्यूत गव तंग, न ज़ोनुन वार तस अथ त्रावनस जंग
छु सार्यन टोट आँखुर जाने शीरीन, सु दुनियादार आँसिन या सु मिसकीन*

जानावार गव समंदरु पेट्च वुडान तु आँखुरस वोत सु अकिस जुविस मंज। बादशाहन येलि पानस तलु कनि जँमीन वुछ, तस च़ोल वसवास। जानावार वोथ जँमीनस प्यठ तु बादशाहन त्राँव तस थफ यलु। पनुन पान सँही सलामथ वुछिथ कोर तँम्य मॉलिकस कुन शुक्र। जानावार च़ोल वुडिथ वापस। बादशाहन सूंच पानस सुती जि खबर कांह ग्वनाह मा आस्यम कोरमुत तु तमिकुय सज़ाह छुम अज़ मेलान। पनुनिस पानस ह्युतुन तसलाह जि यि मॉलिकन ल्यूखमुत आस्यम ति वात्यम।

हारून रँशीद ओस वुनि सौंचानुय जि तस गँयि नाव पकनुच आवाज़ कनन। तँम्य दिन्न समंदरस कुन नज़र। अँकिस नावि मंज आँस्य वारियाह नफर तु जुविस निशि वॉतिथुय वँथ्य तिम नावि मंजु ब्वन। तिमन मंज ओस अख शाहज़ादु तु बाकय तसुंघ अँमीर तु वँज़ीर। वुछान वुछान आव शाहज़ादु सुंदि खॉतरु अख आँलीशान सायेबानु लागनु। पँथरिस आव मखमली फर्श करनु तु अख तख्त लागनु। शाहज़ादु ब्यूठ तख्तस प्यठ। बाकय सॉरी रूद्य इसतादु। अमि पतु ह्योत तिमव अँमीरव तु वँज़ीरव शाहज़ादस र्वख्सथ तु द्रायि नावि क्यथ वापस।

हारून रँशीद गव हॉरान जि शाहज़ादु क्याजि रूद यिथिस बियाबान जुविस मंज कुनुय ज़ोन? सु गव तस ब्रोंटकुन। सलामाह कँरिथ ओस वुनि बादशाहस कँह वनुनय जि शाहज़ादन पुछुस च़ु कुस छुख तु यथ वॉरान जुविस प्यठ क्याह छुख कुनुय ज़ोन करान।

कुनुय ज़ोन, सुत्य छुय ना कांह रफीका, न यारा दोस्ता नय कांह शॅफीका

बादशाहन वोनस नु पोज़ कैह । दोपुनस बु छुस अख सोदागर । बु ओसुस माल जादाद ह्यथ
अँकिस जहाज़स मंज़ पकान जि वावु तूफान आव । म्योन जहाज़ु गव माल असबाब तु
म्यॉन्य नोकर ह्यथ समंदरस पँटिथ । बु बचोस बडु मुश्किलन तु वोतुस यथ जुविस प्यठ ।
चु वुछिथ गोम दिल स्यठाह ख्वश, तमिय आस च़े निशि लारान ।

शाहज़ादु ति गव हारून रॅशीदस वुछिथ ख्वश । दोपुनस, माल जादादुच मु बर फिकिर
कैह । बु करय चोन सोरुय न्वखसान पूर । चु थव पनुन दिल शाद ।

हारून रॅशीदन वोनस, बु ओसुस ग्वडय ज़ॉनिथ जि चु गछख शाहज़ादु आसुन । व्वन्य
वनतम चु क्याज़ि आख योर तु कुनुय ज़ोन क्याज़ि ब्यूठुख यथ वॉरान जाथस मंज़ ?

*सबब वनतम बिहिथ छुख क्याज़ि तन्हा, न हमदम सुत्य छुय, न हम सुखन हा
ब तन्हॉई व वहदत क्याह मुदा छुय, पनुन छुयि ज़ोक किनु शोके खुदा छुय*

शाहज़ादन वोनस, बु छुस फलां मुल्कुक शहनशाह । म्यॉन्य सलतनथ छि स्यठा बँड तु मै
ताबेह छि वारियाह दाना तु आँकुल । म्यॉन्य वॅज़ीर छि स्यठाह मुदबिर तु मसलहत अंदेश ।
तिमन निशि छुनु कांह राज़ छुपिथ । तिमुवुय वोन मै जि यि नोव र्यथ छु मै प्यठ गोब तु
यथ र्यतस म्योन पनुनिस मुल्कस मंज़ रोज़ुन छुनु जान, तिक्याज़ि मै छु हारून रॅशीदुनि
तरफ़ु इज़ाह वातन वोल । अगर बु पनुनिस मुल्कस मंज़ रोज़ु, सु छुनि मै मॉरिथ । म्यान्यव
वॅज़ीरव कोर सलाह तु बु वातुनोव हस यथ जुविस मंज़, योत नु सु हेकि वॉतिथ ।

*सॅमिथ तदबीर ठॅहरॉवख वॅज़ीरव, तिमन म्योनुय गरे नेरुन सलाह प्यव
सलाहे नेक वोनहम छुय च़े बेहतर, सोकूनथ मंज़ जुविस माहस नॅविस कर*

हारून रॅशीदन बूज़ शाहज़ादु संज़ि ज़ेवि पनुन नाव तु गव हॉरतस । तस ओस नु
शाहज़ादस सुत्य कांह अदावथ तु सु मारनुक ओस नु सवालुय पॉदु गछान । तॅम्य सूच जि

शाहज़ादु सुंदव वँज़ीरव छु तसुंद ताज तख्त ख्यनु खॉतरु यि चाल कँरमुन्न। अमिय छुख सु यूत दूर अँनिथ यथ जुविस मंज़ त्रोवमुत। मगर तँम्य वोन नु शाहज़ादस अथ मुतलिक कैह।

शाहज़ादु ओस ख्वश जि सु छु तथ जायि बिहिथ योत नु कांह हेकि वॉतिथ। तँम्य कजि तिमु सारेय शॉही ज़ियाफतु न्यबर, यिम तँम्य अँकिस रयतस ख्यनु बापथ सुत्य आसु अनिमन्न। अथ मंज़ ऑस्य कबाबु, नान, बिरयॉन्य, क्वकर बेत्री प्रथ कांह चीज़ मूजूद। शाहज़ादन कोर हारून रँशीदस साल। दोपुनस च़ु आसख खबर कृति कालुक फाकय। पख ब्रॉठ कुन तु वुछ मज़ु यिमन शॉही ज़ियाफतन हुंद।

अमि पतु ह्योत शाहज़ादन माज़ रानि मंज़ु श्राकपुचि सुत्य अख अख टुकरु च़टुन तु हारून रँशीदस पानय आपरावुन।

कलम त्राशा कोडुन नोजुक स्यठाह तेज़, वुरिथ तथ माज़ आपुरनस कँरिथ तेज़

शराबुक दौर सपुद शुरू। हारून रँशीद गव ज़ियाफतु ख्यथ शाहज़ादु सुंद स्यठाह ममनून। दोपुनस, “चॉन्य मेहमान नवॉज़ी वुछिथ सपदुस बु स्यठाह ख्वश। व्वन्य छु म्योन ति फज़ ज़ि बु करु चॉन्य कैह खँदमथ।”

*सपुन हारून रँशीद ममनूने एहसान, दोपुन शाहज़ादस ऐ यारे वफादार
च़े मेहमान दॉरिया कँरथम ब खूबी, मावज़ु खँदमथाह च़े ति म्यॉन्य शूबी*

हारून रँशीदन वोन शाहज़ादस जि यिथु पॉठ्य च़े आपुरॉविथ मे लोलु सान माज़ फॉल्य, तिथय पॉठ्य आपरय बु ति वापस। शाहज़ादन द्युतुस इजाज़थ। हारून रँशीदन तुल श्रापुकुच नोखस प्यठ अख अस्ल ह्यू माज़ फोल तु आपरोवुन शाहज़ादस। क्वदरतु सुंद करुन सपुद युथ जि अमिय सातु पेयि शाहज़ादस प्वंद। श्राख च़ायि तसुंदिस तालस तु सु प्यव खून हारान पथर तु मूद।

कज़ा ज़ांह फेरि नु हरगिज़ ब तकदीर, कज़ा लारान पतु प्रारान छु तकदीर

हारून रँशीदस प्यव स्टाह दूख। सु गव ख्वदावँदी प्यठ हॉरान। पनुनिस पानस प्यठ गँयि तस शरमंदगी ज़ि नाहक खोत तस शाहज़ादु सुंद खून कलस। तस आव व्वन्य समुज ज़ि जानावारन क्याज़ि ओस सु अथ जुविस प्यठ वातुनोवमुत। अमिय वख्तु प्यव सु जानावार बेयि ओर वॉतिथ। हारून रँशीदस च़ोल व्वन्य पनुनि जुवुक लरज़ु। तँम्य वँर जानावारस ज़ंगि थफ। जानावार गव बुडिथ तु वातुनोवुन सु वापस पनुनिस बागस मंज़।

गुलिस्तान डीशित्थय मसरूर गव शाह, ब हॉरथ ओस, कोत वोतुस बुछुम क्याह

□ मोसूम शाह छु नोश लब ह्यथ नेरनुच सखर करान □

दास्तान खत्म वँरिथ वोन मोसूम शाहन नोश लबि कुन ज़ि येमिस यि मुकदरस मंज़ आसि, तस ति वाति। हरगाह चॉनिस कुस्मतस मंज़ ति च़े यारस निशि वातुन लीखिथ आसिय, तेलि वातुनावी बे शक ख्वदा तस निशि। यि वँनिथ त्रोव मोसूम शाहन डाफ तु पेयस नँदुर।

सुबहस येलि संगर फोल्य, मोसूम शाह गव बेदार। सु वोत बेयि जानावारु सुंदिस पंजरस निशि तु पृछुन तस ज़ि अज़ रातस वँरथा च़े नँदरि ज़्वलाह किनु किही नु? जानावारन द्युतुस जवाब:

*दोपुस तमि यस बुछिथ च़लि कालु शाहमार, तँमिस आरामु सुय सुत्यन छु क्याह कार
दज़ान युस लोलु नारस मंज़ छु हर दम, तँमिस क्युत छुय जहानुक ऑश मातम*

जानावारु सुंदिस रुपस मंज़ ऑस नोश लब वदान तु रिवान। तस ओस सँर्य पेट्ठ सँहलाब गोमुत। स्व ऑस अजब मलिकस समखनु खॉत्रु बे करार। मोसूम शाहस लँज तसुंज हालत बुछिथ दिलस नवि सरु ग्राय। सु द्राव यकदम न्यबर कुन तु सफरुच तयॉरी करनुक द्युतुन होकुम।

येलि सिरियि लोसुनस तयार ओस, मोसूम शाहन तुल जानावारु सुंद ठ्युप अथस क्यथ तु
द्राव सफरस। ग्वलाम तु खँदमथगार आयि सुत्य तुलनु।

मोसूम शाहन रँट बैयतुल अमानुच वथ। सफर ओस स्यठाह कूठ। थख दिनु वरॉय रुद्य
तिम रातस दूहस पकान। ग्वलामन रूज नु व्वन्य ब्रॉठ पकूनस किञ्च कांह सूरथ। अकि
अकि ह्योत तिमय सारिवुय पथ फेरुन। मोसूम शाह रूद व्वन्य कुनुय ज़ोन। तँम्य रोट
ठ्युप पनुनिस कलस प्यठ तु रूद वारु वारु कदम दिवान। येलि दिलस मंज इरादु प्वख्तु
आसि, क्वदरथ ति छु मदद करान। अमिय प्वख्तु इरादु सुत्य वोत ऑखुरस मोसूम शाह
ति बैयतुल अमान। ठ्युप त्रोवुन पानस दूर अँकिस कुल्य लंजि तिथु पॉठ्य अलूंद ज़ि
काँसि हंज नज़र पेयस नु। अमि पतु द्युत तँम्य थख। बैयतुल अमानु क्यन जिनन यामथ
तस प्यठ नज़र पेयि, तिम आयि तस मारनु खॉतरु तु कोरहँस अँद्य अँद्य गेरु। अमि पतु
पृष्ठहस ज़ि च़ कुस छुख तु यथ मुल्कस मंज क्या करनि आख।

मोसूम शाहन वोनुनख ज़ि बु छुस स्यठाह खॉरी तुलिथ यथ जायि वोतमुत। नोश लब छम
सुत्य तु म्योन मुदा छु तसंजि माजि समखुन। नोश लबि हुंद नाव बूजिथ गँय तिम स्यठाह
ख्वश तु लारान लारान वातुनॉवुख यि शेछ नोश लबि हंजि माजि ताम।

खबर येलि कोरि हंजे माजि बूजुन, कँनीज़ाह शाहज़ादस निशि सूजुन

कँनीज़ वॉच मोसुम शाहस निशि तु सु ओनुन पानस सुत्य नोश लबि हंजि माजि गुल बदन
बेगमि निशि। गुलबदन बेगम गँयि मोसुम शाहस वुछिथ स्यठाह ख्वश। स्व ऑस कोरि हंज
शेछ बोज़नु खॉतरु बे करार।

*ब जल्दी कोरि हुंद पॉगाम वनतम, गँयस बे ताब नारस आब छुनतम
दोपुस तमि क्याह च़े छुय पॉगाम ओनुमुत, जिगर छुम बहरे द्रखतर खून सपुनमुत*

मोसुम शाहन वुछ तसंज बे करॉरी तु वोनुनस:

दोपुस तँम्य छम मे अँन्यमुञ्ज सुत्य पानस, ब सख्ती वॉत्य अँस्य बैयतुल अमानस

सफर योद सख्त दून वॅरियन कोडुम कूठ, मे गॅय कोठ्य छोट्य अद दौरान गमुक ज्यूठ

गुल बदन बेगमि लजि अँछ दरस। तमि कोर मोसूम शाहस ज़ारु पारु जि मे करुनावतु कोरि हुंद दीदार। तस सुत्य् वादु कॅरिथ द्राव मोसूम शाह तु ठ्युप ह्यथ आव वापस। माजि येलि कोरि हुंज हालथ वुछ, तस चॅज वदन बाख नीरिथ। अथु थोद तुलिथ पोरनस दुआ तु नोश लब आयि पनुनि शक्लि मंज वापस। अमि पतु रॅट तमि स्व नालुमति तु कॅर्यनस म्वन्य तु मीठ्य।

वोदुख डीशिथ अँकिस अख माजि कोर्यव, च़े तु मे वुछ तु दूर्यर क्याह ज़रुन प्यव
जुदाँयी वुछतु क्या गॅयि जिंद पानय, लीखिथ ती ओस नाहक गव बहानय

माजि आयि नु पछ जि मे वुछा कूर वारु कारु जिंदय। कोरि आयि नु पछ जि मे गॅया बेयि माजि सुत्य् मुलाकात। दशवय येलि अख अँकिस लोल बाँगुराँविथ म्वकलेयि, तमि पतु पृछुनस माजि जि येम्य नफरन च़ु योर वातुनाँवनख, सु कुस छु तु कत्युक छु रोज़न वोल ? नोश लबि वोनूनस जि सु छु नख़्शब मुल्कुक शाहज़ादु तु नाव छुस मोसूम शाह:

वनय क्याह क्युथ छु मॉलिस टोट फरज़ंद, ब ज़ाँरी छुन यि मोंगमुत अज़ ख़दावंद
यि द्युतुमुत छुय तिमन मँग्य मँग्य ख़दायन, वुछान ऑसिस तिमय छायन तु ग्रायन

अमि पतु बोज़नाँव नोश लबि मोसूम शाहन्य सारुय दॅलील माजि जि तिमन किथु पाँठ्य सपुज़ पानुवँन्य मुलाकात तु किथु पाँठ्य वाँत्य तिम योर। यि बूज़िथ सपुज़ गुलबदन बेगम मोसूम शाहस शुक्र गुज़ार।

यि मुश्किल गोम चाने सुत्य् आसान, बु कॅरथस वारयाह ममनूने एहसान
दुबार जिंदगाँनी अज़ च़े दिच़थम, फिदा सपनय मे लादन चाँन्य बड छम

गुलबदन बेगम ऑस तीच़ ख़श जि तस आव नु पथ ब्रोंह किहिन्य लबनु। तमि कॅर अमिय वख्तु नोश लब मोसूम शाहस हवालु जि गछ बु छसनय च़े पनुन्य कूर बख़्शान। मगर मोसूम शाहस ऑस नु नोश लब मंज़ूर। तँम्य दोपुस जि मे छु तस कुन बेनि गँज़रिथ

वुछमुत। बु किथु ह्यकु तस सुतुय खांदर कॅरिथ। म्यानि बदलु करतन स्व तॅस्य बुलबुलस हवालु येम्य सुंद दाग तसुंदिस दिलस मंज़ छु, तु यसुंदि म्वखु तॅम्य यीञ्ज खॉरी तुज।

गुलबदान बेगम गॅयि अथ कथि तयार मगर दोपुनस अजब मॅलिकुन्य छम नु कांह खबर जि सु छा जिंदय किनु मूदमुत। दोपुनस सु ओस मे तुरकिस्तानस अंदर कुनुय ज़ोन अँकिस वॉरान जायि त्रावुनोवमुत। तमि पतु क्याह गुदर्यव तस, मे छनु किहिन्य पताह। मोसूम शाहन वोनस जि अगर म्योन बोज़ख, अख कौंसिद करुन तयार युस बहरीन मुल्कस गॅछिथ नाज़ मस्ति निशि पॉगाम नियि। मे छु पूर यकीन जि हरगाह अजब मलिक जिंदु आसि, सु आसि यकीनन नाज़ मस्ति समखुनि यिवान तु तवु किन्य आसि नाज़ मस्ति तसुंज पूर खबर।

नोश लबि ल्यूख नाज़ मस्ति खॉतरु खत। अथ खतस मंज़ ल्यूख तॅम्य पनुनि दिलुक हाल तु तस कॅरुन गुज़ॉरिश जि म्यॉनिस बालु यारस वातुनावतु म्योन पॉगाम। अथ खतस मंज़ थोव ज़न तु तमि पनुन दिल कॅडिथ:

वैसिये गुलन आवय बहार, अज़ सालु अनतन बालु यार
वॅल्य वॅल्य अनुन फॅल्य लालु ज़ार, अज़ सालु अनतन बालु यार
तस कुन मे कल छम राथ दान, छस तंबलेमुञ्ज कर वुछन
यिमुहस पतय तथ छुम नु वार, अज़ सालु अनतन बालु यार
परवानु रोयस गथ करस, तथ शमा रोयस तल मरस
छम कल तॅहुंज म्वल छुम नु हार, अज़ सालु अनतन बालु यार

तॅवील खत लीखिथ आव सु कौंसिदस अथि बहरीन मुल्कस मंज़ नाज़ मस्ति वातुनावनु। नोश लबि हुंद खत पॅरिथ होर तमि अँछव किन्य खून। कौंसिदस निशि लोग तस पताह जि अजब मॅलिक ओस नैदरि मंज़ुय तुलिथ तुरकिस्तान वातुनावनु आमुत तु तमि पतु छनु तसुंज कांह खबर। वुनि ऑस नाज़ मस्त कौंसिदस सुतुय कथुय करान जि अख वॅनीज़ आयि नाज़ मस्ति शेछ ह्यथ जि अजब मॅलिक छु बरस प्यठ वॉतिथ प्योमुत।

शेछ वॉतिथुय दोरेयि नाज़ मस्त देवानन हुंघ पॉठ्य तु वॉत्र अजब मलिकस निशि। अजब मलिकस ओस बुथ ज़रद्योमुत। नाज़ मस्ति रोट सु बॉय सुंघ पॉठ्य नालुमति। तमि पतु न्यून सु पानस सुत्य हरम खानस मंज़ तु पृष्ठनस हाल। अजब मलिकन वॅनिनस पनुन्यु दॅलील। दोपुनस बु तुलुहॅस नॅदरि मंजुय तु द्युतुहस अँकिस वॉरान जाथस मंज़ दॉरिथ। मगर ख्वदायस ओसुस बु ज़िंदु थावुन तु तमिय बचोस। बु फ्यूरुस तमाम आलमस पनुनिस दिलबरस वॅन्यु दिवान मगर सु ड्युतुम नु कुनि, तु न म्यूलुम तसुंद कांह नेब।

अजब मलिकुन्यु कथ बूज़िथ वॅनिनस नाज़ मस्ति नोश लबि हुंज़ शेछ। तमि पतु होवनस सु खत युस नोश लबि तस ओस सूज़मुत। अमि पतु ल्यूख नाज़ मस्ति योरु खतुक जवाब तु सुती ल्यूखुनस अजब मॅलिकुनि तोर यिनुक वाकह तु तसुंद हाल।

*बुलबुल गुलन छु गारन, परवानु शमा छारन
बॉबुर हमेशु लारन यँबुर ज़लन मुबारक
माह रोयि हाव नोन म्वख, ज़ांह कर बलन तिमन दूख
जिगरस लगन यिमन छ्वख प्यठ त्योंगुलन मुबारक*

खत आव कॉसिदस अथि नोश लबि निशि सोज़नु। तमि युथुय खत पोर तस फ्यूर बुथिस ग्वलॉब्ब्य रंग। दोरान दोरान गॅयि तु होवुन सु खत पनुनि माजि। तमि पतु बोवुन तस खतुक मज़मून। गुलबदन बेगमि बुलोव मोसुम शाह तु वॅनिनस सॉरुय दॅलील। पतु वोनुन तस ज़ि च्यु थोवमख मख्तार, व्वन्यु वनतम च्यु बु क्याह करु? मोसूम शाहन कॅरनस नॅसीहथ। दोपुनस ज़ु दिल पानुवॅन्यु मिलावुनस मंज़ गछि नु तॉखीर युन करनु। अँस्यु गछव माल व जाह, जहाज़ व सिपाह व सलतनथ ह्यथ मुल्के बहरीन तु करनावोख ज़ु जान पानुवॅन्यु मुलाकात।

गुल बदन बेगमि आयि मोसूम शाहन्यु कथ पसंद। स्व गॅयि तु वॅनिन यि कथ पनुनिस खानुदारस। दूनुवय गॅयि अमि कथि बापथ रॉज़ी ज़ि नोश लबि गछि अजब मलिकस सुत्यु खांदर करनुक इजाज़थ युन दिनु। मोसूम शाहस आव अथ रुतिस मशवरस प्यठ कॉफी ज़र तु ज़ेवर दिनु।

प्रथ तरफु सपुद शॉदियानुक माहोल। नोश लब आयि पॉरावनु तु महारेन्य बनावनु। तस आयि कोफूर संदल तु अँत्र मलनु, तु शाहानु पोशाक तु ज़ेवर लागनु।

*प्रज़लवुन हूर बुथ ज़न नूरि मशाल, जि जलवह ऑस नेरान नार वुज़मल
पँरी र्वख क्याह सपुन्य माह पैकराह ज़न, प्रयिवुन्य ख्वश यिवुन्य पोशि थँराह ज़न*

अहलो अयाल तु महारेन्य ह्यथ द्रायि वारु कारु गुल बदन बेगम बैयतुल अमानु प्यठु तु वॉत्य मुल्के बहरीन। मोसूम शाह ओसुख सुत्यु। येलि तिमव पनुन लशकर ह्यथ बहरीनस मंज़ कदम त्रोव, प्रथ तरफु वोथ शोर। नाज़ मस्ति हुंदिस मॉलिस सिपाह सालारस वॉन्न शेछ जि नोश लब छि मोल मॉज ह्यथ शहरस मंज़ वाचमुन्न। सु द्राव पानु तिमन ख्वश आमदीद वनुनि।

अजब मॅलिक आव मोसूम शाहस निशि तु वॅकरिनस ख्वरन मीठ्य।

दुआ कोरनस ख्वरन तल त्रोवनस सर, त्रै बॅलरोवुथ मे सोनमुत अँशुकुनुय ज़र

अमि पतु आव खांदरुक संज करनु। नाज़ मस्ति हुंद मोल सिपाह सालार बन्यव गोबरु यँज़मन। शॉही ज़ियाफतन हुंद आव इन्तिज़ाम करनु। महाराज़ु आव पॉरावनु। मजलिसो महफिल आयि सजावनु। शरबतो शीरीं आयि वफूर बाँगरावनु। साज़ंदव सजॉव पनुन्य महफिल। नोश लबि हुंद मोल सपुद पनुन ज़ामतुर अजब मॅलिक वुछिथ स्यठाह मसरूर तु शाद। तँम्य मंगुनॉव्य कॉज़्य तु तिमव कोर अजब मॅलिकस नोश लबि सुत्यु निकाह। प्रथ तरफु सपुज़ शॉद्य तु पँरियव लोग वनवुन।

*मेति निखु तूर्य किनु चुय यिख योतुये, दिल गोम मोतुये मेलख ना
कनु बोज़ वनुवुन क्याह छुय रुतये, दिल गोम मोतुये मेलख ना*

यिथु पॉठ्य सपुद बाह वॅरी जुदॉयी तु तकलीफ तुलिथ अजब मॅलिकस तु नोश लबि म्युल। तिहँज़ि वॉरान ज़िंदुगी मंज़ आव नोव बहारः

*ब यकजा मील्य बौबुर तय यँबरजल, ब फुरसथ बीठ्य छौंविख ही तु मसवल
द्वयव तशनु लबव चव वसलुकुय आब, फिराकुक राह च़ोलुख गँय सबज़ो सैराब*

खांदरु पतु कॅर नाज़ मस्ति हुंघ मॉल्य सिपाह सालारन नोश लबि हुंदिस मॉलिस मशहूर शाहस दावथ । मशहूर शाह आव अजब मॅलिक तु मोसूम शाह ह्यथ । सिपाह सालारन ओस कुस्मु कुस्मुक्यन ज़ियाफतन तु शरबतन हुंद इन्तिज़ाम कोरमुत ।

मोसूम शाह द्राव मजलिसि मंज़ु न्यबर तु गव पोशि बागस कुन सॉलाह करनि । अति गँयि अँमिस अँकिस ज़नानि हुंदि ग्यवनुच आवाज़ कनन । मोसूम शाह पोक ब्रोंठ कुन । दूरि वुछिन नाज़ मस्त कॅनीज़न मंज़ बिहिथ ग्यवान । मोसूम शाह वोत तस निशि तु द्वशवँन्य पेयि अख अँकिस प्यठ नज़र ।

*येमिस तस कुन नज़र पेयि तस येमिस कुन, सोनुख द्वशवँन्य दिलन तौसीर अँशुकुन
येमिस गुल रोयि दिल गव पार पारु, तँमिस मानंदे बुलबुल खारु खारु*

द्वशवय गँय अख अँक्य सुंदिस अँकस मंज़ गिरिफतार । वुछान वुछान गव तिमन लोलु नारु सुत्य गॉयलु तु द्वशवय आयि पथर लायिनु । कॅनीज़व तुल शोर । क्रख बूज़िथ आयि मजलिसि मंज़ बिहिथ लूख लारान लारान । कॅह गँय नाज़ मस्ति निश तु कॅह मोसूम शाहस निश । अजब मॅलिकन रोट मोसूम शाह ख्वनि मंज़ तु दिचनस शरबथ चैन्य । तमि पतु कोर तँम्य मोसूम शाहस निशि तसुंदि दिलुक राज़ मोलूम ।

अजब मॅलिक वोत सिपाह सालारस निशि तु वॅनिस तस मोसूम शाह तु नाज़ मस्ति हुंदि अँशुकुच कथ । तमि पतु कॅरुन तस गुज़ॉरिश ज़ि नाज़ मस्त गछि यिन्य मोसूम शाहस बख़्शानु । सुती कॅर तँम्य नाज़ मस्ति हुंज़ि ल्वकचि बेनि मस्त नाज़ि हुंज़ कथ ति पनुनिस दोस्तस रासिख सुंदि खौतरु । सिपाह सालार गव द्वशवुन्य कथन मंज़ रौज़ी ।

मोसूम शाहस सपुद नाज़ मस्ति सुत्य तु रासिखस सपुद मस्त नाज़ि सुत्य खांदर । पछस अँकिस रूद्य यिम अँती तु अमि पतु प्यव तिमन पनुन पनुन गरु याद ।

त्रे बुलबुल गँय त्रे गुल ह्यथ हुस्नु वारे, त्रेयव तोतव नियख जीनिथ त्रे हारे

त्रेशवय वॉत्प पादशाहन निशि तु कॅरुख तिमन र्वखसथ दिनु खॉतरु गुज़ॉरिश। दोपुहख असि छु पनुनिस पनुनिस मॉलिस माजि हुंद स्यठाह लोल आमुत। अँस्य छि यछान पनुन पनुन गरु वापस गछुन युथ अँस्य पनुनिस मॉलिस माजि हुंद हक नख वॉलिथ हेकवः

इजाज़थ गोछ करुन असि मेहरबॉनी, सु हक नख वालुहव दर जिंदगॉनी

बादशाहव द्युत वछि वॉलिजि तिमन इजाज़थः

तिमव फरमोवहख छिव पानु म्वखतार, करुन असि शूबि नु अथ जायि इनकार

सुती कॅर बादशाहव तिमन गुज़ॉरिश जि सानि कोरि छे नाज़व सुत्प पालनु आमचु तु युथ नु यिमन ज़ांह दिल फुटरॉविव। अजब मॅलिकन, मोसूम शाहन तु रासिखन कोर अथ कथि यकरार। सुती कॅरुख पनुन्यन गरिक्यन पनुनि वापसी हुज़ शैछ। अमि पतु आयि तिमन हुंदि नेरनुच सखर करनु। तिमन आयि खसुन्य कित्य् गुर्य, शॉही ज़ॉपानु, खज़ानु तु कुमती सामानु सुत्प दिनु। अजब मॅलिक तु रासिख द्रायि नोश लब तु मस्त नाज़ ह्यथ तुरकिस्तान कुन तु मोसूम शाह द्राव नाज़ मस्त ह्यथ नख़ाब कुन। सॉरी वॉत्प पनुन पनुन मुल्क वापस येति त्युहुंद शाहानु इस्तेकबाल आव करनु तु तँथ्य सुत्प आयि जश्न तु शॉदियानु करनु।



मकबूल शाह क़ालुवार्य सुंज़ लीछिमुञ्ज मसनवी
दास्तान-ए-गुलरेज़

Source: 'Gulrez' - compiled by Mohd. Yousuf Teng and 'Kashmiri Zaban
Aur Shairi, Vol: 3' - authored by Abdul Ahad Azad, publications of J&K
Academy of Art, Culture & Languages, Srinagar.

Condensed and Transformed version by M.K.Raina.

Work completed on 1.1.2005. Revised 15.11.2005
